

宋李忠宣公行狀

中上三卷  
下

DS  
751  
L48A2  
1705  
v. 2



EAST ASIAN LIBRARY  
UNIVERSITY OF TORONTO LIBRARY  
130 St. George Street  
8th FLOOR  
TORONTO, CANADA M5S 1A5



宋李忠定公文集選卷首之二

行狀上

計字二萬五千二百九十六



宋丞相特進觀文殿大學士致仕隴西郡開國公贈太師謚忠定李公行狀


曾祖僧護贈少保

祖賡贈太保

父夔任中大夫克右文殿修撰贈太師追封衛國

公母吳氏韓國夫人

公諱綱字伯紀邵武軍邵武縣八龍鄉慶親里人也其先系出有塘有以宗室爲建州刺史卒官因家焉



國朝太平興國四年、析建州置邵武軍、故今爲邵武人、曾大父大父、隱德不仕、行義爲鄉閭所宗、先衛公以進士起家、爲時名卿、妣韓國夫人、處州龍泉人、賢業懿範、中外所仰、事具龜山楊先生所撰墓誌銘、公形神俱清、器識絕人、自幼有大志、舉動必於規矩法度、見者知其必將名世、年十四、從先衛公官延安、時戛人入寇、圍城甚急、舊法邊城被圍、乘城者以日計功、僚屬子弟皆登城冀賞、公蹇不從、然時時騎遶城上、示無所畏、寇退、朝廷以言者謂濫賞報罷、衆以是媿、公將冠、丁韓國夫人憂、廬毗陵錫山塋次、凡三年、

哀感閭里、旣冠、補國子監生第一、方先衛公之入上庠也、名在第一、而公繼之、每試必上列、聲稱籍甚、舉進士未第、以先衛公遇郊祀恩、補假將仕郎、附試貢士、復首送、屬聞莽親之喪、友人貽書、謂道路之傳不的、勉試春官、以慰親望、公不可、調將仕郎、真州司法參軍、政和二年、上舍及第、臚傳之日、徽廟顧問再三、特旨升甲、改合入官、授承務郎、充相州州學教授、以親庭遠、易鎮江、四年、召除行國子正、十二月對便殿、除尚書考功員外郎、五年、謁告迎先衛公于雪川、有旨除先衛公提舉醴泉觀、以便就養、九月還闕、道除

監察御史、兼權殿中侍御史、旣入臺、嘗因職事進對、  
先衛公亦以是日朝見、徽廟顧公曰、卿父子同日造  
朝、縉紳榮事、未幾以論內侍建節、及宰相任用堂後  
官、從官入朝、以笏擊其下、凡三事、忤權貴、罷言職、公  
之在臺、纔一月耳、十一月除尚書比部員外郎、六年  
轉承事郎、七年差克禮部貢院參詳官、八年四月復  
召對、五月除太常少卿、八月除起居郎、十二月差兼  
國史編修官、宣和元年、同知貢舉、六月京師大水、徽  
廟降詔、遣使所以憂勞者甚至、而在位者、乃寂不聞  
有發憤納忠之人、公歎異之、懷不自已、奏疏論列、謂

變異不虛發、必有感召之因、災害未易禦、必有消復之策、臣有已見、急切利害、事須面奏、乞許臣因侍立、次、直前奏事、翌日宰執班退、傳旨閣門令公先退、更不侍立、公因奏便宜六事、且上章待罪、有旨所論不當、送吏部與監當差遣、繼以待罪章上、有旨更降一官、與遠小處監當、授承務郎、監南劍州沙縣稅務、先是父友故贈諫議大夫了齋陳公瓘、識公于幼時、每謂人曰、李公有子、了齋旣以天下之重自任、知無不言、欲求天下奇士、以此道付之、方是時人皆以公爲鳳鳴朝陽、了齋聞之、與先衛公書曰、伯紀所言天下

亦有非之者乎、天下莫有非之者、則其言也時矣、使不當其可、天下豈有不非之者乎、積誨有自、可以百拜爲壽、公旣來沙陽、日所居僧舍曰寓軒、職事之餘、閱藏教於其間、時了齋以書至、且爲公引狄梁公李文靖王文正前言往行、繼之以言曰、嶷嶷梁公、疇克與對、文靖文正、輔世無悔、誰者嗣之、願公繼踵乎筌筏之外、時故右文殿修撰羅公疇方家居、嘗與了齋書、道公從遊之適、了齋報書曰、吾儕老矣、寓軒之人、嘗發妙旨於篋篋、舉世傾耳以需其再鼓、今乃欲韜絃袖手、以適吾儕羸歇之社、若許其來而不拒、則是

私乎適已。而以天下爲非已事也。其爲一時名德推  
與愛重如此。其後公兩在廟堂。所爲所守。天下想聞  
風采。蓋不負了齋所期矣。二年六月。復承事郎。十月  
復本等差遣。三年轉宣教郎。公歸膝下。五月先衛公  
感疾不起。公哀慕不自勝。八月合塋先衛公於韓國  
夫人之塋。了齋方謫居山陽。以文致祭其柩云。孟仲  
叔季。咸遵誨飭。論水者誰。其動也力。不苟不訐。詭曰  
不然。誰其爲之。嚴父之賢。識者謂了齋所許與父子  
之間。不遺餘力矣。喪旣除。七年三月。除太常少卿。六  
月到闕。是冬金人敗盟。邊報狎至。朝廷震懼。不復議

戰守惟日謀避狄之計歲暮賊馬逼近始遣李鄴奉使講和降詔罪已召天下勤王之師且命皇太子爲開封牧宰執日聚都堂茫然無策先是詔求直言有旨召侍從之臣聚議各具所見以聞公上封事大略謂當今禦戎急務要須治其本原敵乃可制杜牧所謂上策莫如自治者誠爲知言所謂治其本原者其說有五一日正己以收人心二曰聽言以收士用三曰蓄財穀以足軍儲四曰審辨令以尊國勢五日施惠澤以彈民怨又陳捍敵十策時建牧之命旣下公素與故相吳公敏厚善敏時爲給事中公夜過其家

謂敏曰、事急矣、建牧之議、豈非欲委以留守之任乎、東宮恭儉之德、聞于天下、以守宗社是也、而建以爲牧、非也、巨盜猖獗如此、自非傳以位號、使招徠天下豪傑、與之共守、何以克濟、公以獻納論思爲職、曷不非時請對、爲上極言之、敏曰、監國可乎、公曰、不可、唐肅宗靈武之事、當時不建號、不足以復邦、而建號之議、不出於明皇、後世惜之、上聰明仁慈、當感公言、萬一能行此、金人且將悔禍、還師、宗社底寧、豈徒都城獲安、天下之人皆將受賜、非發忘身、徇國心、孰能任此、敏翌日求對、具道所以、且曰、陛下果能用臣言、則

宗社寧長、聖壽無疆、徽廟曰、何以言之、敏曰、神霄萬壽宮、所謂長生大君陛下也、必有青華帝君以助之、其兆已見於此、徽廟感悟歎息、敏因言李綱之論、蓋與臣同、有旨召公赴都堂稟議、訖隨宰執至文字庫、祇候別對、實十二月二十三日、公具劄子、大略謂皇太子監國、特國家閒暇之時、典禮如此、今大敵入寇、天下震動、安危存亡、在呼吸間、而用平時典禮可乎、名分不正、而當大權、稟命則不威、專命則不孝、何以號召天下、率勵豪傑、期成功於萬一哉、胡不假皇太子位號、使爲陛下守宗社、收將士心、以死捍禦、仍刺

臂血書之。其日徽廟御玉華閣。先召宰執吳敏等對。至日晡。時內禪之議已決。公不復得對。二十四日。孝慈淵聖皇帝卽位。詔有司討論所以崇奉道君皇帝者。公在奉常條具以聞。二十六日上實封言事。大略謂方今夷狄憑陵。中國勢弱。姦邪充斥。君子道消。法度紀綱蕩然無統。陛下履位適當斯時。得不上應天心。下順人欲。外攘夷狄。使中國之勢尊。內誅姦邪。使君子之道長。以副道君皇帝所以付托之意。二十八日。召對延和殿。淵聖迎謂公曰。卿頃論水災疏。朕在東宮見之。至今猶能誦憶。嘗爲賦詩。有秋來一鳳向

南飛之句、公敘謝訖、因奏曰、今金寇先聲、雖若可畏、然聞內禪、勢必退縮、請和、厚有所邀、求於朝廷、臣竊料之、大槩有五、欲稱尊號一也、如契丹故事、當法以大事小之義、不足惜、欲得歸朝人二也、當盡以與之、以示大信、不足惜、欲增歲幣三也、當告以舊約、以燕山雲中歸中國、故歲幣增於大遼者兩倍、今旣背約、自取之、則歲幣當減、國家散示和好、不較貨財、姑如原數可也、欲求犒師之物四也、當量力以與之、欲求割地五也、祖宗之地、子孫當以死守、不可以尺寸與人、願陛下留神於此數者、執之堅、無爲浮議所搖、可

無後艱。淵聖嘉納。二十九日。除兵部侍郎。靖康元年。正月三日。充行營司參謀官。蓋幹離不之。兵遂渡河。是日聞報故也。夜漏二鼓。道君皇帝東幸。官闈相續以行。侍從百官。徃徃潛遁。四日。公侍對班於延和殿下。聞宰執奏事。議欲奉鑾輿出狩襄鄧間。公思之以爲不可。適遇知東上閤門事朱孝莊。於殿庭間語之。曰。有急切事。欲與宰執廷辨。公能奏取旨乎。孝莊曰。宰執未退。而從官求對。前此無例。公曰。此何時而用例耶。孝莊許諾。卽具奏。得旨引對。公因啓奏曰。聞諸道路。宰執欲奉陛下出狩。以避狄。果有之。宗社危矣。

聖氣壯  
可以壯  
服

要著

且道君皇帝以宗社之故傳位陛下今捨之而去可  
乎淵聖默然太宰白時中曰都城豈可以守公曰天  
下城池豈有如都城者且宗廟社稷百官萬民所在  
捨此欲將何之若能率勵將士慰安民心與之固守  
豈有不可守之理淵聖顧宰執曰策將安出宰執默  
然公進曰今日之計莫若整鬬軍馬揚聲出戰固結  
民心相與堅守以待勤王之師淵聖曰誰可將者公  
曰朝廷平日以高爵厚祿崇養大臣蓋將用之於有  
事之日今白時中李邦彥等雖書生未必知兵然藉  
其位號撫馭將士以抗敵鋒乃其職也時中怒甚厲

聲曰、李某莫能將兵出戰否。公曰、陛下不以臣爲庸懦。倘使治兵。願以死報。淵聖顧宰執曰、執政有何闕。趙野對曰、尚書右丞闕。淵聖曰、李綱除右丞、面賜袍帶、并笏、公致謝、且敘方時艱難、不敢辭之意。宰執猶以去計勸淵聖、有旨命公爲東京留守、公爲淵聖力陳、所以不可去者。且言唐明皇聞潼關失守、卽時幸蜀、宗社朝廷、碎于賊手、累年然後僅能復之。范祖禹謂其失、在於不能堅守。以待勤王之師。今陛下初卽大位、中外欣戴、四方之兵、不日雲集、虜騎必不能久留。捨此而去、如龍脫於淵、車駕朝發、而都城夕亂。雖

臣等留守。何補於事。淵聖意頗回。而內侍王孝竭從旁奏曰。中宮國公已行。陛下豈可留此。淵聖色變。降榻曰。卿等無留朕。朕將親往陝西。起兵以復都城。決不可留此。公泣拜俯伏。淵聖前以歿邀之。會燕越二王至。亦以固守爲然。淵聖意稍定。卽取帑御書可回二字。用寶。俾中使追還中宮國公。因顧公曰。卿留朕治兵禦寇。專以委卿。不得稍有疎虞。公惶恐再拜受命。是夕宿於尚書省。而宰執宿于內東門司。中夜淵聖遣中使令宰執候軍令狀。詰旦決行。五日公自尚書省趨朝。道路紛紛。復傳有南狩之事。太廟神主已

出寓太常寺矣。至祥曦殿則禁衛皆擐甲乘輿服御  
皆已陳列。六宮襍被皆將升車矣。公遑遽無策。因厲  
聲謂禁衛曰。爾等願以死守宗社乎。願扈從以巡幸  
乎。禁衛皆呼曰。願以死守。宗社不居此。將安之。公因  
拉殿帥王宗濂等入見曰。陛下昨夕已許臣留。今復  
戒行。何也。且六軍父母妻子皆在都城。豈肯捨去。萬  
一有中道散歸。陛下孰與爲衛。且虜騎已逼。彼知乘  
輿之去未遠。健馬疾追。何以禦之。淵聖感悟。始命輟  
行。公謂宰執曰。敢有異議者斬。因出祥曦殿傳旨。宣  
示禁衛。皆拜伏呼萬歲。其聲震地。復入勸淵聖御樓。

以見將士淵聖可之、駕登宣德門、宰執百官將士、班樓前起居、復降步輦、勞問將士、公與吳敏撰數十語、敘金人犯順、欲危宗社、決策固守、各令勉勵之意、俾閣門官宣讀、每讀一句、將士聲喏、須臾六軍皆感泣流涕、於是固守之議始決、是日以公爲親征行營使、一切許以便宜從事、自車駕御樓之後、方治都城四壁守具、以百步法、分兵備禦、每壁用正兵萬二千餘人、而保甲居民廂軍之屬不預焉、凡防守之具無不畢備、又團結馬步軍四萬人、爲前後左右中軍、軍八千人、日肄習之、以前軍居東水門外、護延豐倉、倉右

粟豆四十萬石、其後勤王之師集城外者、賴之以濟、  
以後軍居宋門外、占樊家岡、使賊騎不敢近、而左右  
中軍居城中、以備緩急、自五日至八日、治戰守之具、  
粗畢、而賊馬已抵城下、是夕攻西水門、公臨城捍禦、  
斬獲百餘人、自初夜防守達旦、始保無虞、翌日賊攻  
酸棗、封丘門、公慮城上兵卒不足用、乞禁衛班直善  
射者千人以從、傳旨如所乞、賊渡壕、以雲梯攻城、公  
命班直乘城射之、皆應弦而倒、公登城督戰、激厲將  
士、人皆賈勇、近者以手砲、櫛木擊之、遠者以神臂弓  
強弩射之、又遠者以牀子弩、座砲及之、而金賊有乘

棧渡壕而溺者、有登梯而墜者、有中矢石而踣者、甚衆、又募壯士數百人、縋城而下、燒雲梯十座、斬獲酋首十餘級、皆耳有金環、淵聖遣中使勞問、降御筆褒諭、有公忠略之志、朕記於心、及公悉心捍禦、朕皆知之、之語、特給內庫酒銀絹等、以旌將士、人皆歡呼、自卯至未間、殺賊數千人、賊知城守有備、不可以攻、乃退師、因遣使隨李鄴請和、抵城下已昏、堅欲入城、公傳令輒開門者斬、竟俟明乃入、實初十日也、淵聖御崇政殿、引使入對、出幹離不書進呈、道所以舉師犯中國之意、聞上內禪、願復講和、乞遣大臣赴軍前議

所以和者、公因請行、淵聖不許曰、卿方治兵、不可、命李桵奉使、鄭望之高世則副之、宰執退、公留身問所以不遣之旨、淵聖曰、卿性剛、不可以往、公對曰、今虜氣方銳、吾大兵未集、固不可以不和、然所以和者、得策、則中國之勢遂安、不然、禍患未已、臣恐李桵等柔懦而誤國事也、因爲淵聖反覆具道、所以不可割地、及過許金幣之說、淵聖頗以爲然、李桵是日至軍中、果辱命、北面再拜、膝行而前、金人出事目一紙、付桵等達朝廷、桵唯唯不能措一辭、金人笑之曰、此乃一嬖人女子爾、自是有輕朝廷心、十一日桵至自軍前、

宰執同對于崇政殿、進呈金人所須事目、須金五百萬兩、銀五十萬兩、絹綵一百萬匹、馬騊驢騾之屬、各以萬計、尊其國主爲伯父、凡燕雲之人在藻者悉歸之、割大原中山河間三鎮之地、又以親王宰相爲質、乃退師、且道其語甚狂厲、宰執震恐、欲如其數、悉許之、公引前議力爭、以謂尊稱及歸朝官、如其所欲、固無害、犒師金幣、所索太多、當量與之、太原河間中山、國家屏蔽、號爲三鎮、其實十餘郡地、塘灤險阻皆在焉、割之何以立國、又保塞翼順、僖三祖陵寢所在、子孫奈何與人、至於遣質、卽宰相當往、親王不當往、爲

今日計莫若擇使與之往返、熟議道所以可不可者、金帛之數、令有司會計所有、續具報、宿留數日、大兵四集、彼以孤軍入重地、勢不能久留、雖所得不滿意、必求速歸、然後與之盟、以重兵衛出之、彼且不敢輕中國、其和可久也、宰執皆不以爲然、謂都城破在朝夕、肝腦且塗地、尚何有于三鎮、而金幣之數、又不足較也、淵聖爲羣議所惑、凡爭踰兩時、無一人助公言者、公自度力不能勝衆說、因再拜求去、淵聖慰諭曰、不須如此、卿第出治兵、益固城守、恐金人款我、此徐議可也、公被旨不得不出、復前進曰、金人所須、宰執

欲一切許之、不過欲脫一時之禍、不知他日付之何人、能爲陛下下了此、願更審處、後悔恐無所及、因出至城北壁、復迴、尚與可以力爭、而誓書已行矣、所求悉皆與之、今上皇帝方在康邸、俾同少宰張邦昌爲質、於金人軍中、公無如之何、則爲之留三鎮詔書、戒中書吏、以輒發者斬、庶幾俟四方勤王之師集、以爲後圖、而宰執裒聚金銀、自乘輿服御、宗廟供具、六宮官府器皿、皆竭取、復索之於臣庶之家、金僅及三十萬兩、銀僅及八百萬兩、宰執以金銀之數少、惶恐再拜謝罪、公獨不謝、於是王孝廸建議、欲盡括在京官吏

軍民金銀、揭長榜於通衢、立限輸官、限滿不輸者斬之、許奴婢親屬及諸色人告、都城大擾、限旣滿、得金二十餘萬兩、銀四百餘萬兩、而民間藏蓄爲之一空、公奏淵聖曰、收簇金銀限滿、民力已竭、復許告訐、恐生內變、外有大敵、而民心又變、不可不慮、淵聖曰、卿可往收榜歸行營司、移牒王孝廸照會、人情乃安、自十五日、四方勤王之師、漸有至者、日數萬人、公爲於四壁、置統制官、招集之、至十七八日、統制官馬忠以京西募兵至、遇金人於鄭州南門外、乘勢擊之、殺獲甚衆、金人始懼、遊騎不敢旁出、而自京城以南、民始

獲奠居矣二十日种師道姚平仲以涇源秦鳳兵至公奏淵聖曰勤王之師集者漸衆兵家忌分節制歸一乃克有濟願令師道平仲等聽臣節制而宰執間有密建白以爲不可者於是別置宣撫司以師道簽書樞密院事充河北河東京畿宣撫使以平仲爲宣撫司都統制西兵及四方勤王之師竝隸宣撫司又撥前後軍之在城外者屬之而行營司所統者獨左右中軍而已淵聖屢申勅兩司不得侵紊節制旣分不相統一宣撫司所欲行者託以機密徃徃不復關報公私憂之自議和誓書旣行之後金人益肆須索

無所忌憚、及勤王之師旣集、西兵將帥日至、淵聖意  
方壯、又聞金人虜掠城北、屠戮如故、而城外墳墓殯  
殮、發掘殆盡、始赫然有用兵意、公贊淵聖曰、易於謙  
之上六、稱利用行師、征邑國、師之上六、稱開國承家  
小人勿用、蓋謙之極、非利用行師、不足以濟功、師之  
成、非戒用小人、不足以保治、今陛下之於金人、屈已  
講好、其謙極矣、而金人貪婪無厭、兇悖已甚、其勢非  
用師不可、然功成之後、願陛下以用小人爲戒、使金  
人有所懲創、不敢有窺中國之心、當數十年無夷狄  
之禍、不然、一日縱敵、數世之患、憂未艾也、二十七日

公與李邦彥吳敏種師道姚平仲折彥質同對于福寧殿議所以用兵者公奏淵聖曰金人之兵得其實數不過六萬人又大半皆奚契丹渤海雜種其精兵不過三萬人吾勤王之師集城下者二十餘萬固已數倍之彼以孤軍入重地正猶虎豹自投檻穽中當以計取之不可角一旦之力爲今之策莫若扼河津絕糧道禁抄掠分兵以復畿北諸邑俟彼遊騎出則率之以重兵臨賊營堅壁勿戰如周亞夫所以困七國者俟其芻糧乏人馬疲然後以將帥檄取誓書復三鎮縱其歸半渡而後擊之此必勝之計也淵聖意

深以爲然、衆議亦允、期卽分遣兵、以二月六日舉事、  
約已定、而姚平仲者、古之子、屢立戰功、在道君朝爲  
童貫所抑、未嘗朝見、至是淵聖以其驍勇、屢召對內  
殿、賜予甚厚、平仲武人、志得氣滿、勇而寡謀、謂大功  
可自有之、先期於二月一日夜、親率步騎萬人、以劫  
金人之寨、欲生擒所謂幹離不者、取今上皇帝以歸、  
雖种師道宿城中、弗知也、公時以疾給假、臥行營司、  
夜半淵聖遣中使降親筆曰、平仲已舉事、決成大功、  
卿可卽以行營司兵出封丘門、爲之應援、公具劄子  
辭以疾、且非素約、兵不豫備、斯須之間、中使三至、責

以軍令、不得已力疾分命諸將、解范瓊王斯古等圍、  
斬獲甚衆、復犯中軍、公親率將士、以神臂弓射却之、  
是夜宿於城外、而平仲刼寨、爲虜所覺、殺傷相當、折  
千餘人、旣不得所欲、卽恐懼遁去、宰執臺諫、闕然謂  
西兵勤王之師、及親征行營司兵、皆爲金人所殲、無  
復存者、淵聖震恐、有詔不得進兵、而幹離不遣使、亦  
謂用兵特將帥所爲、不出上意、請再和、宰相李邦彥  
於淵聖前、語使人曰、用兵乃李綱與姚平仲結約、非  
朝廷意、僉議欲縛公以予之、使人反以爲不可、遂罷  
公尚書右丞、親征行營使、以蔡懋代、總兵蔡懋、計會

行營司兵所失纔百餘人、西兵及勤王之師折傷千  
人、外餘並如故、乃知朝廷前所聞之非、是夕淵聖賜  
親筆慰勞、且令吳敏宣諭、將復用之意、公感泣謝恩、  
方欲丐歸田廬、而太學生陳東與諸生千餘人詣闕  
上書、明公及師道之無罪、不當罷、軍民聞之、不期而  
集者數十萬人、填塞馳道街巷、呼聲震地、昇登聞鼓  
於東華門、擊破之、軍民必欲見公、及師道乃去、於是  
淵聖遣中使召公及師道入對、公聞命惶懼、固辭不  
敢行、而宣召絡繹、不得已入見淵聖於福寧殿、閣子  
中、公泣拜請死、淵聖亦泣、有旨復公尚書右丞、充京

城四壁守禦使、公固辭、淵聖不允、俾出東華門、至右掖門一帶、安撫軍民、公稟聖旨宣諭、乃稍散去、再對于福寧殿、淵聖命公復節制勤王之師、先放遣民兵、蓋不復有用兵意也、所留三鎮詔書、公旣罷、乃遣宇文虛中齎詣金人軍中、是夕公宿于咸豐門、以金人進兵門外、治攻具故也、先是蔡懋孺令將士、金人近城輒施放、有引砲及發牀子弩者、皆杖之、將士憤怒、公旣登城、令施放自便、能中賊者厚賞之、夜發霹靂砲以擊賊、賊皆驚呼、翌日薄城射却之、乃退、金人自平仲劫寨、及封丘門接戰之後、頗有懼意、旣得三鎮

詔及肅王爲質卽不俟金幣數足遣使告辭初十日  
遂退師十三日宰執對延和殿公奏淵聖曰澶淵之  
役雖與大遼盟約而退猶更遣重兵護送之蓋恐其  
無所忌憚肆行虜掠故也金人退師今三日矣盍遣  
大兵用澶淵故事護送之宰執皆以爲太早公固請  
之淵聖以公言爲然可其議是日分遣將士以兵十  
餘萬數道並進且戒諸將度便利可擊則擊之金人  
厚載而歸輜重旣衆驅虜嬪女不可勝計氣驕甚擊  
之決有可勝之理將士踴躍以行十四日除公知樞  
密院事封開國伯食邑八百戶食實封一百戶十七

日、澤州奏黏罕旣破忻代、圍太原、陷威勝、軍入南北關、陷隆德府、遂次高平、朝廷震懼、恐其復渡河而南、宰執咎公盡遣城下兵、以追幹離不之師、將無以支吾、公曰、幹離不之師旣退、自當遣兵護送、黏罕之師雖來、聞旣和、亦當自退、決無他虞、而執政中有密啓淵聖者、悉追還諸將之兵、諸將之兵及幹離不之師於邢趙間、相去二十里、金人聞大兵且至、莫測多寡、懼甚、其行甚速、而諸將得追詔卽還、公聞之、于淵聖前、力爭得旨、復遣、而諸將之還已五程矣、雖復再進、猶與金人相及於滹沱河、然將士知朝廷之議論二

三、悉解體不復有邀擊之意、第遙護之而已、於是金人復旁出抄掠、及深祁恩冀間、其去殊緩、而黏罕之兵、聞已和、果退、如公言、乃命种師道爲河東河北宣撫使、駐滑州、而以姚古爲制置使、統兵以援太原、种師中爲制置使、總兵以援中山、河間諸郡、先是公乞力守三鎮不可割之議、朝廷僉議以租賦歸之、求保祖宗之地故也、三月詔以道君廻鑾、命門下侍郎趙野爲奉迎使、初恭譏行宮、所以都城圍閉、止絕東南通角、又止東南勤王之師、又令綱運於所在、卸納泗州官吏以聞、朝廷不以爲然、道路籍籍、且言有他故、

道君還次南都、欲詣亳州、上清宮燒香、及取便道如西都、淵聖憂之、每有御書至、必及朝廷改革政事、又批道君太上皇后、當居禁中、出入正門、又批吳敏李綱、令一人來、莫曉聖意、公奏淵聖曰、所以欲臣及吳敏來、無他、欲知朝廷事耳、吳敏不可去、陛下左右臣願前奉迎、如蒙道君賜對、臣且條陳自圍城以來事宜、以釋兩宮之疑、決無他虞、淵聖初不許、公力請之、乃聽、卽令齎御書、逢道君行宮、抵南都、道君御幄殿、公升殿奏事、具道皇帝聖孝思慕、欲以天下養之意、道君泣數行下、曰、皇帝仁孝、天下所知、且獎諭曰、都

城守禦、宗社再安、相公之力爲多、公因出劄子、乞道君早回鑾輿、不須詣亳社西都、以慰天下之望、道君慰勞再三、因曰、相公頃爲史官、緣何事去、公對曰、臣昨任左史、得侍清光者幾一年、以狂妄論列都城水災、伏蒙聖恩、寬斧鉞之誅、迄今感戴、道君曰、當時宰執中、有不喜公者、公愧謝、因奏曰、臣昨論水災、實偶有所見、天地之變、各以類應、正爲今日兵革攻圍之兆、災異變故、譬猶一人之身、病在五臟、則發於氣色、形于脈息、善醫者能知之、所以聖人觀變於天地、而修其在我者、故能制治保邦、而無危亂之憂也、道君

以爲然、因詢虜騎、攻圍都城、守禦次第、公具以實對、道君復曰、賊旣退師、方渡河時、何不邀擊、公曰、朝廷以肅邸在金人軍中、故不許、道君曰、爲宗社計、豈復論此、公於是竊歎道君天度之不可及也、語旣浹洽、道君因宣諭行宮止遘角等三事、只緣都城受圍、恐金人得知行宮所在、非有他也、公奏曰、方艱危時、兩宮隔絕、彼此不相知、雖朝廷應副行宮事、亦不容無不至者、在聖度照之而已、道君因詢朝廷近事、如追贈司馬光、及毀拆夾城等、凡二十餘事、公逐一解釋、復奏曰、皇帝小心仁孝、惟恐一有不當、道君太上皇

帝意者、每得御批詰問、輒憂懼不進膳、臣竊譬之、人家尊長出、而以家事付之子弟、偶強盜刼掠、須當隨宜措置、爲尊長者、正當以能保田園大計、慰勞之、不當問其細故、今皇帝傳位之初、陛下巡幸、適當大敵入寇、爲宗社計、政事不得不小有變革、今宗社無虞、四方以寧、陛下回鑾、臣謂宜有以大慰安皇帝之心者、其他細故、一切勿問可也、道君感悟曰、公言極是、朕只緣性快問、後便無事、因內出玉帶金魚袋古象簡、賜公曰、行宮人得公來皆喜、以此慰其意、便可佩服、公固辭不允、因服之以謝、宣諭曰、本欲往亳州太

清宮、以道路阻水不果、又欲居西洛、以皇帝懇請之、勤、已降旨、揮、更不戒行、公先歸、逢此意、慰安皇帝、因袖中出書付公、仍宣諭曰、公輔助皇帝、扞賊、守宗社、有大功、若能調和父子間、使無疑阻、當書青史、垂名萬世、公感泣、再拜受命、辭訖、卽行、先具劄子、以所得道君聖語、奏知淵聖、批答曰、覽卿來奏、知奏對之語、忠義煥然、朕甚嘉之、二十五日還抵闕下、進呈道君御書、具道所以問答之語、淵聖嘉勞久之、二十七日、宰執進呈車駕出郊迎奉道君儀注、耿南仲建議、欲盡屏道君左右內侍、出榜行宮門、敢留者斬、先遣人

搜索、然後車駕進見、公謂不必如此、示之以疑、南仲  
曰、或之者疑之也、古人於疑有所不免、公曰、古人雖  
不免於疑、然貴於有所決斷、故書有稽疑、易曰以斷  
天下之疑、儻疑情不解、如所謂竊鈇者、則爲患不細、  
南仲紛紛不已、公奏曰、天下之理、誠與疑、明與暗而  
已、誠則明、明則愈誠、自誠與明推之、可至於堯舜、疑  
則闇、闇則愈疑、自疑與闇推之、其患至於有不可勝  
言、耿南仲當以堯舜之道輔陛下、而其人闇而多疑、  
所言不足深採、上笑之、南仲怫然怒甚、旣退、再召對  
睿思殿、南仲忽起奏曰、臣適遇左司諫陳公輔、於對

班中、公輔乃二月五日、爲李綱結士民伏闕者、豈可處諫職、乞送御史臺根治、上及宰相皆愕然、公奏曰、臣適與南仲辨論於延和殿、實爲國事、非有私意、而南仲銜臣之言、故有此奏、伏闕之事、陛下素所鑒察、臣不敢復有所辨、今南仲之言如此、臣豈敢留願以公輔事送有司、臣得乞身待罪、上笑曰、伏闕士庶、以億萬計、如何結約、朕所洞知、卿不須如此、南仲猶不已、公因再拜辭上而出、不復歸府、入劄子求去、章凡十餘上、皆批答封還不允、道君皇帝以三日入國門、公扈從朝于龍德宮、訖復上章懇請求罷、知樞密院

事并繳進劄子、謂今日朝廷方禍亂、救寧之初、正當以別白是非爲先、廟堂之上、是非不明、何況天下、若以南仲之言爲是、朝廷自當付之有司、根治黨與、誠果有之、臣首在誅夷之列、若以南仲之言爲非、則當明告中外、洞然曉知、使臣不受黯闇之謗、臣之於此、豈得不辨、必若朝廷重惜大體、欲兩全之、莫若與臣一宮祠、使歸田里、上降手詔數百言、不允、有曰、廼者虜在近郊、士庶伏闕、一朝倉猝、衆數十萬、忠憤所激、不謀同辭、此豈人力也哉、不悅者造言、何所不可、故卿不自安、殊不知朕深諒卿之不預知也、復令徐處

仁吳敏諭旨、又召至內殿、面加慰諭、且曰、賊馬方邊、正賴卿協濟艱難、前事不足介懷、宜爲朕少留辭意、懇惻、公不得已就職、虜騎出境、公具奏乞用富弼守禦二策、分兵控扼要害之地、又乞修邊備、防秋仍用李邕措置塘泺水匱等事、批荅依奏、又具劄子乞措置三鎮、及詔在廷之臣、集議擇其所長而施行之、於是條具所以備邊禦敵者凡八事、其一謂以太原真定中山河間、建爲藩鎮、又分濱棣德博建橫海軍一道、如諸鎮之制、其二謂河北河東保甲、宜專遣使團結訓練、令各置器甲、官爲收掌、用印給之、蠲免租賦、

以償其直、其三謂復祖宗監牧之制、其四謂河北塘  
灤不復開濬、又自安肅廣信以抵西山、可益增廣、宜  
尋遣使以督治之、其五謂河北河東州縣城池、皆當  
築城、民有所恃而安、其六謂河北河東州縣、經賊馬  
殘破、蹂踐去處、宜優免租賦、以賑卹之、其七謂宜復  
祖宗加撻糧草鈔法、一切以見緝、走商賈而實塞下、  
其八願復祖宗解鹽舊制、淵聖俾宰執同議、而其間  
所論異同、公力爭之、不能得、大抵自賊馬旣退、道君  
還宮之後、朝廷恬然、遂以爲無事、防邊禦寇之策、置  
而不問、公切憂之、惟兵事樞密院可以專行、乃與同

知樞密院事許翰議淵聖前謂今秋敵必再至宜豫  
詔天下起兵防秋爲捍禦之計條具將上得旨頒行  
然後關三省其間猶有以爲不湏如此者公又乞降  
旨在京許監察御史以上在外監司郡守帥臣各薦  
材武智略大小使臣樞密院籍記姓名量材錄用淵  
聖從之二十四日以覃恩轉大中大夫吳敏建議欲  
置詳議司簡詳祖宗法制及近年弊政當改革者次  
第施行之詔以公爲提舉官命旣行爲南仲沮止公  
奏淵聖曰陛下卽大位於國家艱危之時宜一新政  
事朝廷玩愒未聞有所變革近欲置司討論尋復罷

之、今邊事方棘、調度不給、前日爵祿冒濫、耗蠹邦財者、宜稍裁抑。以足國用。淵聖以爲然、委公條具以聞。公條上三十餘事、淵聖深然之、降付三省、已而揭榜通衢曰、知樞密院事李綱、陳請裁減、下項又榜東華門曰、守禦使司、給諸軍鈔甲錢、多寡不均、御前特再行等第支給、而守禦使司、初未嘗給鈔甲錢也。公聞之驚駭、徐詢所以、乃執政有密白淵聖、以公得都城軍民之心者、欲以此離散之、公始憂懼、不知死所矣。方欲丐罷、五月初、會守禦使司、補進武副尉二人、具狀奏知、淵聖批出、有惟辟作福、惟辟作威、大臣專權、

浸不可長之語、公惶懼於淵聖前、明辨曰、始親征行營、及守禦使司、得旨、一切以便宜行事、給空名文武告勅宣帖等三千餘道、自置司以來、用過三十一道而已、此二人乃齎御前蠟書、至太原、當時約以得回報、卽以補授、故今以空名帖補訖、奏聞、乃遵上旨、非專權也、且敘孤危之蹤、爲人所中傷者、非一、願罷職任、乞骸骨以歸田里、淵聖溫顏慰諭、謂偶批及此、非有他意、公待罪丐章、二十餘上、皆批答不允、遣使宣押歸府、公翌日見淵聖曰、人主之用人、疑則勿任、任則勿疑、而大臣以道事君、不可則止、今陛下惑於人

言於臣不能無疑、又不令臣得去、不知聖意何在、淵  
聖安慰久之、公自此多在告日、欲去而未能、會种師  
中歿於軍前、師道以病告歸、執政有密建議、以公爲  
宣撫使代師道者、初黏罕之師至太原、城下、太原堅  
壁固守、黏罕屯兵圍之、悉破諸縣、爲鑠城法、以困太  
原、姚古進師復隆德府、威勝軍扼南北關、累出兵互  
有勝負、然不能解太原之圍、於是詔种師中、由井陘  
道、與姚古犄角應援太原、師中進次平定軍、乘勝復  
壽陽、榆次諸縣、不設備、有輕金人之意、又輜重犒賞  
之物、悉留真定、金人乘間衝突、諸軍以神臂弓射却

之、欲賞射者、吏告不足、而罷士皆憤怒、相與散去、師中爲流矢所中、死之、師道駐滑州、復以老病丐罷、淵聖納議者之說、決意用公、宣撫兩路、督將士解圍、一日召對、諭所以欲遣行者、公再拜力辭、自陳書生不知兵、在圍城中、不得已爲陛下料理兵事、實非所長、今使爲大帥、恐不勝任、且誤國、死不足以塞責、淵聖不許、卽命尚書省出勅令、而受。公奏曰、藉使臣不量力、爲陛下、行亦須擇日受敕、今拜大將、如召小兒可乎、淵聖乃許、別日受、公退卽移疾乞致仕、力陳不可爲大帥、且云、此必有建議、不容臣於朝者、章十餘上、

並批答不允、且督令受命、於是臺諫相繼上言、公不當去、朝廷淵聖皆謂爲大臣遊說、斥去之、乃無敢言者、或謂公曰、公知上所以遣行之意乎、此非爲邊事、乃欲緣此以去公、則都人無辭耳、公堅臥不起、讒者益得以行其說、上且怒、將有杜郵之賜、奈何、公感其言、起受命、淵聖錄裴度傳以賜公、入劄子、具道吳元濟以區區環蔡之地抗唐室、與金人強弱固不相侔、而臣魯不足以望裴度萬分之一、且言寇攘外患、有可掃除之理、而小人在朝、蠹害本根、浸長難去、其患有不可勝言者、謂宜留神照察、在於攘逐戎狄之先、

朝廷旣正、君子道長、則所以捍禦外患者、有不難也。  
今取裴度論元稹、魏洪簡章疏、節其要語、輒塵天聽。  
淵聖優詔寵荅、宣撫司得兵二萬人、分爲五軍、時勝  
捷兵叛於河北、遣左軍往招撫之、又遣右軍屬宣撫  
副使劉韜、又以解潛爲置制副使、代姚古、以折彥質  
爲河東幹當公事、以潛治兵於隆德府、宣撫使見兵  
實有萬二千人、所得銀絹纔二十萬、期以六月二十  
二日啓行、而庶事未辨集、乞量展行期、淵聖批曰、遷  
延不行、豈非拒命、公惶懼入劄子、辨所以未可行者、  
且曰、陛下前以臣爲專權、今以臣爲拒命、方遣大師

解重圍、而以專權拒命之人爲之、無乃不可乎、願併  
罷樞筦之任、乞骸骨、淵聖趣入數四、公入見、具道所  
以爲人中傷、致上聽不能無惑者、祇以二月五日、士  
庶伏闕事、今奉命出使、無緣復望清光、淵聖驚曰、卿  
只爲朕巡邊、便可還闕、公曰、臣之行、無有復還之理、  
管范仲淹自參知政事、出安撫西邊、過鄭州、見呂夷  
簡、語暫出之意、夷簡曰、參政豈復可還、其後果然、今  
臣以愚直、不容於朝、使臣旣行之後、無沮難、無謗讒、  
無錢糧不足之患、則進而死敵、臣之願也、萬一朝廷  
執議不堅、臣自度不能有所爲、卽須告陛下、求代罷

去、陛下亦宜察臣孤忠、以全君臣之義、上頗感動、乃以二十五日戒行、前期錫燕於紫宸殿、又賜御筵於瓊林苑、所以賜勞甚渥、公犒軍訖、號令將士、斬裨將焦安節以徇、初安節隸姚古帳下、在威勝軍、虛傳賊馬且至、安節鼓扇衆情、勸姚古退師、至隆德、又勸遁去、於是兩郡之人、皆驚擾潰散、而初無賊馬、至是從姚古還闕、公召斬之、人皆以爲當、翌日進師、以七月初、抵河陽、入劄子、以畿邑汜水關、西都河陽、皆形勝之地、城壁頽圯、當亟修治、今雖晚、然併力爲之、尚可及也、又因望舁諸陵具奏曰、臣總師、道出鞏洛、望舁

陵寢、潜然流涕、恭惟祖宗創業守成、垂二百年、聖聖傳授、以至陛下、適丁艱難之秋、戎狄內侵、中國勢弱、此誠陛下嘗膽思報、厲精求治之日、願深考祖宗之法、一一推行之、進君子、退小人、無以利口善譎言爲足信、無以小有才、未聞君子之大道爲足使、益固根本、以圖中興、上以慰安九廟之靈、下以爲億兆蒼生之所依賴、天下幸甚、初公陞辭日、爲上道唐恪聶山之爲人、陛下信任之篤、且誤國、故於此申言之、上批答、有銘記于懷之語、留河陽十餘日、訓練士卒、修整器甲之屬、進收懷州、自出師後、禁士卒不得擾民、有

趕奪嬖人釵子者、立斬以徇、拾遺棄物、決脊黥配、逃  
亡捕獲皆斬、以故軍律嚴肅、無敢犯者、公嘗謂步不  
勝騎、騎不勝車、于是造車千餘輛、日肄習之、俟防秋  
之兵集、以謀大舉、而朝廷降旨、凡詔書所起之兵、悉  
罷減之、公上疏力爭、大略謂今河北賊馬出沒並邊、  
諸郡寨柵相連、兵不少休、太原之圍未解、而河東之  
勢甚危、秋高馬肥、決須深入、宗社安危、殆未可知、故  
臣輒不自揆、措畫降詔、團結防秋之兵、不過十萬人、  
使一一皆到、果能足用、而無賊馬渡河之警乎、臣被  
旨出使、去清光之日未幾、朝廷已盡改前日詔書、團

結之兵、罷去大半、若謂太原之圍、賊馬不多、不攻自  
解、則自春徂秋、攻守半年、曾不能得其實數、姚种二  
帥、以十萬之師、一日皆潰、彼未嘗有所傷軀、不知何  
以必其兵之不多、今河北河東州郡、日告危急、乞兵  
皆以三五萬爲言、而半年以來、未有一人一騎、可以  
副其求者、防秋之兵甫集、又皆遣罷、若謂不須動天  
下之兵、而自可無事、則臣誠不足以任此責、陛下胡  
不遣建議之人代臣、坐致康平、而爲此擾擾也、未報  
間、再具奏曰、近降旨、揮減罷防秋之兵、臣所以深惜  
此事者、一則河北防秋關人、恐有疎虞、二則一歲之

間再令起兵、又再止之、恐無以示四方大信、夫以軍法勒諸路起兵、而以寸紙罷之、臣恐後時有所號召、無復應者矣、竟不報、淵聖日以御批促解太原之圍、而宣撫副使、制置副使、察訪使、幹當公事、都統制、皆承受御前處分、事得專達、進退自如、宣撫司雖有節制之名、特文具耳、公奏淵聖以節制不專、恐誤國事、雖降旨揮約束、而承受專達自若也、公極爲淵聖論節制不專之敝、又分路進兵、賊以全力、制吾孤軍、不若合大兵、由一路進、會范世雄以湖南兵至、卽薦爲宣撫判官、方欲會合、親率師以討賊、而朝廷之議變

矣、初賊騎旣出境、卽遣王雲曹暉使金人軍中、議以  
三鎮兵民、不肯割地、願以租賦代割地之約、至是遣  
回、有許意、其實以款我師、非誠言也、朝廷信之、耿南  
仲唐恪尤主其議、至謂非歸租賦、則割地以賂之、和  
議可以決成、乃詔宣撫司、不得輕易進兵、而和議之  
使、紛然於路矣、旣而徐處仁吳敏罷相、而相唐恪許  
翰罷同知樞密院事、而進用聶山陳過庭李回等、吳  
敏復以內禪事、責授散官、安置涪州、公竊歎曰、事亡  
可爲者矣、因入表劄奏狀、丐罷、初唐恪議出公於外、  
則處仁敏翰、可以計去之、數人者去、則公亦不能留

也、至是皆如其策、章數上、猶降詔批答不允、公具奏  
力道所以材能不勝任者、且得昏憤之疾、不罷決誤  
國、并敘曩日榻前之語、於是淵聖命种師道以同知  
樞密院事、巡邊、交割宣撫司職事、召公赴闕、且俾沿  
河巡視防守之具、公連上章乞罷、知樞密院事、守本  
官致仕、九月初交割宣撫司職事、與折彥質、公行至  
卦丘縣、除觀文殿學士、知楊州、具奏辭免、不敢當、且  
上疏言、所以力丐罷者、非愛身怯敵之故、特事有不  
可爲者、難以虛受其責、始宣撫使得兵若干、并防秋  
兵若干、今屯駐某處、皆不曾用、始朝廷應副銀絹錢


若干、又御前降到若干、除支官兵食錢、并犒賞外、今皆椿留懷州、及在京降賜庫具、有籍可考、按也。臣旣罷去、恐不知者謂臣喪師費財、惟陛下遣使覈實、雖臣自以不材、丐罷、願益擇將帥、撫馭士卒、與之捍敵、金人狡獪、謀慮不淺、和議未可專恃、一失士卒心、無以禦侮、則天下之勢去矣。臣自此不復與國論、敢冒死以聞、旣而言者果謂公專主戰議、喪師費財、於是着落職、提舉亳州、明道宮、責授保靜軍節度副使、建昌軍安置、又以公上疏辨論、還有後言、再謫寧江。



宋李忠定公文集選卷首之三

行狀中

計字萬三千三百廿八



建炎元年丁未春行次長沙被閹十一月三日旨揮復元官除資政殿大學士領開封府事時金寇再犯闕前以和議爲然者舉皆誤國淵聖感悟故復召公然都城圍閉道路阻絕久之方聞命卽率湖南勤王之師入援王室傳元帥府檄方審都城不守二聖播遷號慟幾絕次太平州觀上登寶位赦書悲喜交集是時金陵爲叛卒周德所據囚帥臣殺吏民焚舟船劫官府公卽遣使臣齎文檄諭之令聽稟節制勤王

乃肯釋甲、然桀驚不以時登舟、擅驅不當行士卒、欲  
乘間遁去、旣次金陵、因與權安撫使李彌遜謀誅其  
首惡四十六人、而以其徒千餘人、令提舉常平官王  
枋統之、以行、因奉表詣行在、賀登極、且辭領開封之  
命、上書論時事、次寶應、聞降麻告廷、除正議大夫、尚  
書右僕射、兼中書侍郎、隴西郡開國侯、加食邑七百  
戶、食實封三百戶、行次虹縣、始有旨趣召蓋行在、前  
此不知公由江淮以來也、次會亭、上遣中使王嗣昌  
傳宣撫問、賜銀合茶藥、次穀熟、御史中丞顏岐遣人  
投文字、封以御史臺印、乃論公不當爲相、章疏大意

謂張邦昌爲金人所喜、雖已爲三公郡王、宜更加同  
平章事、增重其禮、公爲金人所惡、雖已命相、宜及其  
未到罷之、置之閑地、前後凡五章、皆不降出、故岐封  
以示公、欲公之留外而不進也、公乃知命相出於淵  
衷、獨斷而外庭所以沮之者、無所不至、益以感懼、復  
會遣使趣召、遂行、有旨賜御筵於金果園、龍圖閣學  
士兼侍讀董耘來傳上旨云、常遣從事郎劉黶齋御  
書、由湖北迂鄉、書中有學窮天人、忠貫金石、方今生  
民之命、急於倒懸、諒非不世之才、何以協濟事功之  
語、公感泣流涕、遂如行在、上遣使趣見、進對于內殿、

見上敘致、不覺涕泗橫流、上亦感動、因奏曰、金人不  
道、專以詐謀、取勝中國、而朝廷不悟、一切墮其計中、  
自古夷狄之禍中國、未有若此之甚、賴天佑我宋、大  
命未改、故使陛下總師于外、爲天下臣民之所推戴、  
興衰撥亂、持危扶顛、內修政事、外攘夷狄、以還二聖、  
以撫萬邦、皆責在陛下與宰相、而考慎之際、首及微  
臣、自視闕然、不足以仰副陛下知遇之意、伏望追寢  
成命、上曰、朕知卿忠義智略甚久、在靖康時、宣力爲  
多、特爲同列所不容、故使卿以非罪去國、而國家有  
禍、故如此、朕嘗言於淵聖、欲使夷狄畏服、四方安寧、

非相卿不可、今朕此志已定、卿其勿辭、公頓首泣謝、  
且道董耘所傳聖語、荷知如此、雖折糜不足以報德、  
然臣未到行在數十里間、御史中丞顏岐、封示論臣  
章疏、謂臣爲金人所惡、不當爲相、如臣愚蠢、但知有  
趙氏、不知有金人、固宜爲其所惡、然岐之論臣、謂才  
不足以任宰相、則可、謂爲金人之所惡、不當爲相、則  
不可、臣愚不知其所喜者爲趙氏耶、其所惡者爲趙  
氏耶、今陛下用臣、斷自淵衷、而岐之論如此、如臣迂  
疎、自知不足以當重任、但願一望清光、卽乞身以歸、  
至於陛下命相、於金人所喜所惡之間、更望聖慮有

以審處於此、上笑曰、岐嘗有此言、朕告之以如朕之  
立、恐亦非金人之所喜者、岐無辭而退、此不足卹公  
奏曰、陛下天縱聖明、固不難察此、然臣材力緜薄、實  
不足以勝任、因出劄再拜力辭、上慰諭久之、遣御藥  
邵成章宣押赴都堂治事、時六月一日也、翌日有旨  
立新班奏事、對於內殿、同執政奏事、訖、力陳不敢當  
一相之任、上曰、卿素以忠義自許、豈可於國家艱危  
之時、而自圖安閑、朕決意用卿、非在今日、社稷生靈、  
賴卿以安、卿其無辭、公感泣再拜曰、臣愚陋無取、不  
意陛下知臣之深也、然今日之事、持危扶顛、以創業

爲法、而圖中興之功、在陛下而不在臣、昔管仲語桓公曰、不能知人、害霸也、知人而不能信、害霸也、能信而又使小人參之、害霸也、夫知人能信任之、而參以小人、猶足以害霸、況於爲天下而欲建中興之業乎、方靖康之初、淵聖皇帝慨然有圖治之意、而金人退師之後、漸謂無事、是非雜揉、且和且戰、初無定議、如臣者、徒以愚直好論事、爲衆人不容、使總兵于外、又不得節制諸將、自度不足以任責、乞身以退、而讒譖竄逐、必欲殺之、而後已、賴淵聖察臣孤忠、特保全之、卒復召用、然已無及矣、不謂今日遭遇陛下、龍飛初

無左右先容之助、徒採虛聲、首加識擢、付與宰柄、顧臣區區、何足以仰副圖任責成之意、然靡不有初、鮮克有終、如臣孤立寡與、更望聖慈、察管仲害霸之言、留神於君子小人之間、使臣得以盡志畢慮、圖報涓埃、雖死無憾、昔唐明皇欲相姚崇、崇以十事要說、皆中一時之病、類多施行、後世笑之、臣嘗慕其人、今臣亦敢以十事、仰干天聽、陛下度其可行者、願賜施行、臣乃敢受命、其未合聖意者、願賜折難、臣得以盡其說、上可之、公因出劄子奏陳、一曰議國是、大略謂中國之御夷狄、能守而後可戰、能戰而後可和、而靖康

之末皆失之。今欲戰則不足，欲和則不可，莫若自治。專以守爲策，俟吾政事修，士氣振，然後可議大舉。其二曰：議巡幸。大略謂車駕不可不一到京師，見宗廟以慰都人之心，度未可居，則爲巡幸之計。以天下形勢觀之，長安爲上，襄陽次之，建康又次之，皆當詔有司預爲之備。其三曰：議赦令。大略謂祖宗登極赦令，皆有常式。前日赦書一切以張邦昌僞赦爲法，如赦惡逆、選人循資、責降罪廢官、盡復官職，皆汎濫不行，謂當改正以法祖宗。其四曰：議逆僭。大略謂張邦昌爲國大臣，不能臨難死節，而挾金人之勢，易姓建

號其後不得已、乃始奉迎朝廷尊崇之爲三公郡王  
參與大政、非是、宜正典刑、垂戒萬世。其五曰議僞命、  
大略謂國家更大變故、鮮仗節死義之士、而奉賊旨  
受僞官、以屈膝於其庭者、不可勝數、昔肅宗平賊、汗  
僞命者、以六等定罪、今宜倣之以厲士風。其六曰議  
戰、大略謂軍政久廢、士氣怯情、宜一新紀律、信賞必  
罰、以作其氣。其七曰議守、大略謂賊情狡獪、必須復  
來、宜於汾河江淮、措置控禦、以扼其衝。其八曰議本  
政、大略謂崇觀以來、政出多門、綱紀紊亂、宜一歸之  
於中書、則朝廷尊。其九曰議久任、大略謂靖康間、

退大臣太速、功效蔑著、宜慎擇而久任之、以責成功。  
其十曰議修德、大略謂上初膺天命、宜益修孝悌恭  
儉之德、以副四海之望、而致中興。翌日降出議國是  
巡幸、赦令戰守、五劄子、餘皆留中。次日與執政同奏  
事于內殿、進呈議國是劄子。上曰、今日之策、政當如  
此、以次進呈四劄子。奏事訖、公留身奏上曰、臣愚瞽  
輒以管見十事、冒瀆天聰、已蒙施行五事、如議本政  
久任修德三事、無可施行、自應留中。所有議張邦昌  
僭逆、及受僞命臣寮二事、皆今日刑政之大者、乞早  
降處分。上曰、執政中有與卿議論不同者、更俟款曲

商量公曰、邦昌僭逆之罪、顯然明白、無可疑者、當道君朝、邦昌在政府者幾十年、淵聖卽位、首擢爲相、奉使虜中、方國家禍難之時、倘能以死守節、推明天下所以戴宋之義、以感動其心、虜人未必不悔禍而存趙氏、邦昌方自以爲得計、偃然當之、正位號、處宮禁者、月有餘日、虜騎旣退、四方勤王之師集、邦昌擅降僞詔以止之、又遣郎官分使趙野翁、彥國等、皆齎空名告、數百道、以行、而彥國等囚其使、而四方勤王之師日進、邦昌知天下之不與也、不得已、乃請元祐太后、垂簾聽政、而議奉迎、邦昌僭逆本末如此、而議者

不同、臣請備論、而以春秋之法斷之、若都城之人、則  
謂因邦昌立而得生、且免再科金銀而德之、若元帥  
府、則謂邦昌不待征伐、遣使奉迎而恕之、若天下則  
謂邦昌建號易姓、其奉迎特出於不得已、而憤恨之  
都城德之、元帥府恕之者、私也、天下憤恨之者、公也、  
春秋之法、人臣無將、將而必誅、趙盾不討賊、則書以  
弑君、今邦昌已僭位號、賊退而止勤王之師、非特將  
與不討賊而已、其罪爲如何、晉劉盆子以宗室、當漢  
室中衰、爲赤眉所立、其後以十萬衆降光武、而光武  
祇待以不死、今邦昌以臣易君、其罪大於盆子、不得

已以身自歸、朝廷旣不正其罪、而又尊崇之、以爲三公郡王、參與國政、此何理也、議者又謂邦昌能全都城之人、與宗廟宮室、不爲無功、而陛下登極、緣邦昌之奉迎、臣皆以爲不然、譬之人家偶遭寇盜、主人之戚屬、悉爲驅虜、而其僕欲掩家室奴婢而有之、幸主人者、有子自外歸、迫於衆議、不得而有、乃欲遂以爲功、其可乎、陛下之立、乃天下臣民之所推戴、邦昌何力之有、臣於劄子中論之詳矣、方國家艱危、陛下欲建中興之業、當先正朝廷、而尊崇僭逆之臣、以示四方、其誰不解體、又僞命臣僚、一切置而不問、何以勵

天下士大夫之節、執政中有不同議論者、乞降旨宣召、臣得與之廷辨、如臣理屈、豈復敢言、上許之、乃令小黃門宣召黃潛善、呂好問、汪伯彥、再對上語之、故而潛善主之甚力、詰難數四、乃屈服、然猶持在遠不若在近之說、公曰、邦昌當正典刑、何遠近之有、借使在近、亦當幽繫、而反尊崇之如此何也、潛善不能對、上顧呂好問曰、卿在城中知其詳、謂當如何、好問曰、邦昌僭竊位號、人所共知、旣已自歸、惟陛下裁處、又引德宗幸奉天、不挾朱泚行、後以爲悔、以附會潛善不若在近之說、公曰、呂好問、援朱泚以爲例、非是、方

德宗之狩奉天、朱泚蓋未反也、姜公輔以其得涇軍心、恐資以爲變、請挾以行、德宗不聽、而其後果然、今邦昌已僭逆、豈可使之在朝廷、使道路指目曰、此亦一天子哉、因泣拜曰、臣不可與邦昌同列、正當以笏擊之、陛下必欲用邦昌、第罷臣勿以爲相、無不可者。上頗感動、汪伯彥亦曰、李綱氣直、臣等不及。上乃曰、卿欲如何措置、公曰、邦昌之罪、理當誅夷、陛下以其常自歸宥其死而遠竄之、受僞命者等第責降可也。上曰、俟降出卿劄子、來日將上取旨、翌日同執政進呈、潛善猶左右之、乃以散官安置潭州、次進呈議僞。

命劄子上曰、國家顛覆、士大夫不聞死節、往往因以爲利、如王及之坐蕃衍宅門、詬詈諸王、余大均誘取宮嬪以爲妾、卿知之否、公奏曰、自崇觀以來、朝廷不復惇尚名節、故士大夫鮮廉寡耻、不知君臣之義、靖康之禍、視兩宮播遷、如路人然、罕有能仗節死義者在內、惟李若水在外、惟霍安國死節顯著、餘未有聞、願詔京畿諸路詢訪、優加贈卹、如王及之余大均、朝廷見付御史臺推鞠、必得其實、臣聞方金人欲廢趙氏立張邦昌、令吳玠莫俦傳道意旨、往返數四、王時雍徐秉哲奉金人旨、追捕宗室戚里、令居民結保、不得

容隱以袂聯屬以往、若囚繫然、其後迫道君東宮后  
妃親王出郊、皆臣子之所不忍言、又受僞命、皆爲執  
政、此四人者、宜爲罪首、上以詢呂好問、而好問以爲  
有之、得旨皆散官、廣南遠惡州軍安置、餘以次謫降、  
內王及之余、大均、胡偲、陳中等、以賊濫繫御史臺、候  
結案、日取旨。李若水已贈官、外霍安國贈延康殿學  
士、有死節者、令諸路詢訪以聞、上曰、卿昨日內殿爭  
張邦昌事、內侍輩皆泣涕、卿今可以受命矣、公拜謝  
曰、自非陛下英睿天縱、豈能決斷如此、天下不勝幸  
甚、臣雖愚陋、敢不龜勉自力、以圖報稱、因爲上言、今

日國勢比之創業爲尤難、正賴陛下剛健不息、以至誠惻怛之意加之、不爲羣議所動搖、先其大者急者、而小者緩者、徐圖之、信任而責成功、臣乃得以竭盡愚慮、以裨補萬一、復奏曰、人主莫大於兼聽廣視、使下情得以上通、陛下卽大位已踰月、而檢鼓院猶未置、恐非所以通下情而急先務、又請置看詳官兩員、于侍從中選用、凡士民上封事可施行者、將上取旨、有旨兼克御營使、以覃恩轉正奉大夫、進封開國公、加食邑一千戶、食實封四百戶、時六月六日也、是日同執政對于內殿、公奏上曰、以今日國勢而視靖康

間其不逮遠甚、然而有可爲者、陛下英斷於上、而群臣輯睦於下、庶幾革靖康之風、而中興可圖、然今日之事、須有規模、及先後緩急之序、所謂規模者、外禦強敵、內消盜寇、修軍政、變士風、裕邦財、寬民力、改弊法、省冗官、誠號令以感人心、信賞罰以作士氣、擇帥臣以任方面、選監司郡守以奉行新政、俟吾所以自治者、政事已修、然後可以議興舉、而問罪金人、迎還二聖、此規模之大畧也。至於所當急而先者、莫先于料理河北河東兩路、夫河北河東者、國之屏蔽也、料理就緒、然後中原可保、而東南可安、今河東所失者、

析代太原澤潞汾晉其餘猶存也河北所失者不過  
真定懷衛濬四州而已其餘中山河間慶源保塞雄  
霸深祁恩冀邢洛磁相信安廣信二十餘郡皆爲朝  
廷守兩路士民兵將所以戴宋者其心甚堅皆推豪  
傑以爲頭領多者數萬人少者亦不下萬人如此知  
名字者已十數處朝廷不因此時置司遣使有以大  
慰撫之分兵以援其危急臣恐爲金人所守糧盡力  
困坐受其敝兩路軍民雖懷忠義之心使救援之兵  
久而不至危急無告必且憤怨朝廷金人因得撫而  
用之皆精兵也莫若於河北置招撫司河東置經制

司、擇有材畧者爲之、使宣諭陛下德意、所以不忍棄  
兩河於夷狄之意、朝廷應副錢糧告勅、有功者、卽命  
以官、其能保全一州、收復一郡、隨其高下、以爲節度  
防禦團練使、如唐方鎮之制、使自爲守、非特絕其從  
賊之心、又可資其力以禦敵、朝廷久遠無比顧之憂  
此最今日之先務也。僉議頗以爲然、上曰、誰可任此  
者、公奏曰、陛下倘採用臣策、臣當詢訪其人、續具奏  
旣退、詢於士大夫間、多謂張所可以招撫河北、傅亮  
可以經制河東、公亦頗聞其爲人、張所者、山東人、當  
靖康間、爲監察御史、朝廷以金人再犯闕、欲割棄河

北、旣遣使矣、虜騎薄城、京師圍閉、所在圍城中、獨上言、乞以蠟書募河北兵、淵聖許之、蠟書至河北、士民皆喜曰、朝廷欲棄我于夷狄、猶有一張察院、欲救我而用之乎、應募者凡十七萬人。故所之聲滿河北、部勒旣定、會都城破、謀勿果用、上卽位于南都、所首至行在、見上論列、且條具應募首領姓名人數、合措置事件以聞、朝廷欲以爲郎官、奉使河北以董其事、會所以察官上章、論黃潛善及兄潛厚姦邪、不可用、恐害新政、潛善引去、上留之、乃謫所鳳州團練副使、江州安置、是時公未至行在也、故衆謂招撫河北、非所

不可、然公以所常論潛善之事頗難之、不得已、一日  
過潛善閣、子中相與款語曰、前日議置河北招撫司、  
搜訪姝無人、可以承當、獨一張所可用、又以狂妄有  
言得罪、儻能先國事、後私怨、爲古人所難、不亦美乎、  
潛善欣然許諾、乃薦之於上、且道潛善意、上說有旨  
借所通直郎、直龍圖閣、充河北招撫使、遣使臣齎劄  
子召對、摹畫稱旨、錫五品服、內府賜緡錢百萬以備  
募兵半年費、給空名告千餘道、以京畿兵千人爲衛、  
將佐官屬、聽自辟置、一切許以便宜從事、有朝請郎  
王圭者、真定府人、真定府旣破、率衆數萬、保西山、屢

勝金賊、聞上登極、自山寨間道來、其所謀正與朝廷同、能道河北事尤詳、有旨除直祕閣、招撫司參謀官、使佐所、傳亮者、陝西人、以邊功得官、諳練兵事、靖康初至京師、上封事、請以親王爲元帥、治兵於河朔、其冬復有薦者、再召之、亮至而都城已破、率陝右京西勤王兵三萬人、首至城下、屢立功、統御將帥、率如古人、斬然整一、無敢犯令者、上卽位、亮詣行在、召對、除通直郎、直祕閣、而亮之爲人、氣勁言直、議論不能屈、拆執政不喜之、除知滑州、滑兩經殘破、無城壁、亮上疏自陳曰、陛下復歸東都、則臣能守滑、陛下未歸、則

臣亦不能守也。執政摘其語以爲悖傲不遜。降通判河陽府公至行在。亮已行。使人召之。乃來與語。連日觀其智略氣節。真可以爲大將者。欲且試之。乃薦於上。以爲河東經制副使。而以觀察使王瓚爲使。瓚亦陝西人。累立邊功。僉謂在武臣中可用者。上宣諭亮前疏中語。公廣上意而奏曰。人臣論事。言不激切。不足以感動人主。激切則近謗訕。故昔之聽言者。必察其所以。如果出於謗訕。何所逃罪。至於有所激而云。則必恕之。以來讜言。如周昌之對高祖。劉毅之對武帝。皆人之所難堪者。而二主恕之。以其有所激故也。

亮言如此、但欲激陛下以歸京師耳、非有他故、願陛下有以含容之、且人材難得、而將帥之材爲尤難、如亮者、今未見其比、異日必能爲朝廷立大功、氣勁言直、乃關陝氣俗之常、不足深責、上乃許如所請、並召劉、賜亮五品服、與兵萬人、告勅銀絹、與川綱之在陝西者、詔京西陝西漕臣應付糧草、餘與張所已得旨而遣之、初公建議以料理河北河東爲所當先者、適後宮降誕皇子、率執政入賀、公奏上曰、皇子降誕、考祖宗故事、當肆赦、陛下登寶位、赦已曠蕩、獨遺河北河東而不及、勤王之師、天下尚觖望、夫兩路爲朝廷

堅守而赦令不及、人皆謂已棄之、何以慰忠臣義士之心、而勤王之師、雖不曾用、在道路半年、擐甲荷戈、冒犯霜雪、亦已勞矣、疾病歿亾者、不可勝數、恩卹不及、後日復有急難、何以使人願因今赦、該載德意、上嘉納、故皇子赦於二者尤詳、又請降詔、褒慰兩路守臣將佐軍民、諭以朝廷措置、救援不棄之意、又詔自今有能收復兩路、已陷州軍、及救解危急、保全一方、功效顯著者、並除本處節度觀察防禦團練、依方鎮法、命使臣齎藥、徧賜兩河守臣將佐、命權貨務、印造見錢鈔、遣使齎送兩路州郡、命降見錢鈔三百萬貫、

付河北東路、陝西路、漕司廣糴、應副兩路、命起京東路、夏稅絹、於大名府、樁管、川綱、河東衣絹、於未興軍樁管、以待兩路支俵、於是兩路知天子德意、人情翕然、蠟書日至、間有破賊捷報、虜人圍守諸郡者、徃徃抽退、且土寨應招撫經制司募者甚衆、而潛善建議、令馬忠將所部兵、會雄州弓箭手李成所募兵、凡五萬人、擣虛入界、虜必釋諸郡之圍、以自救、公曰、今日士怯兵弱、恐未可深入、莫若使之與張所協力、先復潛衛懷三州、而真定可復、潛善堅執其議、上可之、公不欲力爭、乃以忠爲河北經制使、而以張換副之、換

者陝西人質朴有謀而善戰其材遠勝於忠旣使副  
忠又令與張所相應援而換亦以公之策爲然有許  
高許亢者防河而遁至南康軍且欲爲變守倖以便  
宜誅之衆謂擅殺非是公曰淵聖委高亢防河付以  
兵將甚衆賊將至先走以鐵騎五百自潁昌趨江南  
沿路刼掠甚於盜賊朝廷不能正軍法而一軍壘守  
倖敢誅之必健吏也使後日受命捍賊者知退走而  
郡縣之吏有敢誅之者其亦少知所戒乎是當賞上  
以爲然乃命各轉一官時開封闕留守公以爲非宗  
澤不可力薦之澤至京師果能彈壓撫循軍民畏愛

修治城池樓櫓、不勞而辦、屢出師以挫賊鋒、雖嫉之者、溪竟不能易其任也、其後許翰至、公薦之于上、謂翰外柔內剛、謀議明決、宜參決大政、上亦喜其論事、乃以爲尚書右丞、初汴河上流爲盜所決者數處、綱運不通、命都水使者陳求道等措置而水復舊、綱運杏來、間撥入京師、米價始平、又於兩京城外及沿汴至泗、增設巡檢、商賈始通、人情漸復舊、命進奏院邸吏分番赴行在、朝廷差除、鏤板傳報、外路增置馬遞、舖、命令始通、綱運入京者、還載諸部公案圖籍赴行在、官府始有稽考、蓋行在草創、凡百皆一一措置、悉

此類也。又進呈三劄子。一曰募兵。二曰買馬。三曰募民出財以助兵費。上皆以爲然。又議措置控禦修舉軍政。謂宜於沿河沿淮沿江諸路置帥府要郡。次要郡使帶總管鈐轄都監以寓方鎮之法。許其便宜行事。辟置僚屬將佐以治兵。又命招置新軍及御營司兵。並依新法團結。五人爲伍。伍長以牌。書同伍四人性名。二十五人爲甲。甲正以牌。書伍長五人性名。百人爲隊。隊將以牌。書甲正四人性名。五百人爲部。部將以牌。書隊將正副十人性名。二千五百人爲軍。統制官以牌。書部將正副十人性名。有所呼召。使令。按

牌以遺、而逃亡、歿傷、皆可周知、三省樞密院、同置賞  
功司、置籍以受功狀、三日不檢舉施行者、必罰、受賄  
乞取者、行軍法、許人告、遇敵逃潰者、斬、因而爲盜賊  
者、誅其家屬、凡軍政申明約束、及更改法制者、數十  
條、皆勅榜通衢、將士觀者、皆奮厲、公又奏宜詔諸路  
州縣、以漸修葺城池、繕治器械、且請以車制、頒於京  
東西、使製造而教閱之、因繪圖進呈、有旨令御營司  
製造閱習、諸將皆以爲可用、乃頒降兩路、委提刑司  
總領之、又奏於沿江沿淮州郡、置造戰船、因其俗之  
之所宜、招募水軍、平居許其自便、有故則糾集而用

之、逐時教閱量行激賞、又詢訪陝西山東及諸路武  
臣材略可用者、以備將佐偏裨之任、有旨皆召赴行  
在、自六月初、至是凡四十餘日、措置邊防軍政之類、  
始漸就緒、是時朝廷議遣使金國、公奏上曰、堯舜之  
道、孝悌而已、孝悌之至、可以通於神明、今陛下以上  
皇淵聖、遠狩沙漠、食不甘味、寢不安席、思迎還兩宮、  
致天下養、此孝悌之至、而堯舜之用心也、今日之事、  
正當枕戈嘗膽、內修政事、外攘夷狄、使刑政修、中國  
強、則二聖不俟迎請而自歸、不然、卽冠蓋相望、卑辭  
厚禮、朝迎暮請、恐亦無益、今所遣使、但當奉表通問、

兩宮致思慕之意可也。上以爲然。命公草表。並致書二虜酋。乃以周望傳。雲皆借官。爲二聖通問使。齎表及書以往。又奏曰。陛下當艱難時。爲臣民之所欣戴。纂承大統。宜降哀痛之詔。以感動天下。具言金賊不道。賴天下士民同心協力。相與扶持保守。以致中興者。按其所言。次第行之。無爲虛文。務施實惠。上乃命公撰擬詔文。進呈。頒降。又具劄子。乞省冗員。以節浮費。上命中書條具。乃詔省臺寺監官。以繁簡相兼。復開封府官舊制。減學官員額。罷提舉常平司。併歸提刑司。罷兩浙福建市舶司。併歸轉運司。復幕職曹官。

舊制、非萬戶縣不置丞、罷吏員三分之一、又請以三省堂吏、依祖宗法、轉官不得過朝請大夫、初陳乞出官、止爲通判、一應宰執子弟、以恩數帶貼職、及待制以上、並罷宰執及見任官觀待闕、未有差遣、京朝官以上俸錢、並減三分之一、有旨從之、是時劇賊李昱擾山東、杜用起淮南、李孝忠亂襄陽、皆遣將討平之、其餘降者十餘萬、一日論及靖康間事、上曰淵聖勤於政事、省覽章奏、有至於終夜不寐、而卒有播遷之禍、何也、公奏曰、淵聖在東宮、令德聞于天下、及卽大位、適當國步艱難之時、勤儉有餘、而爲小人之所惑、

故卒誤大事、人主之職、但當知人、雖不親細務、大功可成、上以爲然、公因論靖康之初、金人犯闕、中國所以應之者、得策凡二、道君內禪、一也、淵聖固守、二也、使其後更得一策、中國可以無事、而和戰兩者皆失之、遂致大故、而夷狄之患、至今爲梗、方金人初犯闕、提兵不過六萬人、旣薄城下、累日攻擊、知都城堅固、士卒奮勵、不可攻、則遣使厚有所邀求、而請和、臣獻策淵聖、謂金人之所邀求、有可許者、有不可許者、宜遣使者、往來款曲、與之商議、俟吾勤王之師旣集、然後與之約、其可與者許之、其不可與者、堅執而勿許、

則約易成而和可久、當時不以爲然、一切許之、其後  
果不能如約、遂再入寇、此失其所以和也。勤王之師  
集于都城、四面者二十餘萬、臣獻策淵聖、謂兵家忌  
分、宜使節制歸一、用周亞夫困七國之策、以重兵與  
之相臨、而分兵收復畿邑、使無所得糧、俟其困而擊  
之、一舉可破、當時不以爲然、置宣撫司、盡以勤王之  
兵屬之、故姚平仲得先期舉事、而朝廷懲劫寨小衄、  
不復議兵、賊退又不肯邀擊、遂使金人有輕中國之  
心、而中國之勢日弱、此失其所以戰也。一失機會、悔  
不可追、今日機會尤不可失、願陛下以靖康爲鑑、審

處而決斷以應之、庶可以成功。上曰：靖康之初，能守而金人再來，遂不能守，何也？公奏曰：靖康之初，與靖康之末，其勢不同。條目甚多。臣請論其大者。金人初入寇，未知中國虛實，亦無必犯京闕之意。特中國失備，無兵以禦之，故使得渡河，以至城下，而粘罕之兵亦失期不至。及其再來，兩路並進，遂有吞噬中原之心。此其不同者一也。靖康之初，賊至城下，不數日間，勤王之兵已集。及其再來，賊已圍城，始以蠟書募天下兵，遂不及事。此其不同者二也。靖康初，賊寨于西北隅，而行營司出兵屯于城外要害之地。四方音問

李綱之  
係於國  
明白極  
矣胡高  
宗之鮮  
克有終  
耶

絡繹不絕、勤王之兵既集、賊遂歛兵不敢復出、其後  
再來、朝廷自決水以滄浸京城、西北瀰漫數十里、而  
東南不屯一兵、使賊反得以據之、故城中音問不傳  
于外、而外兵亦不得以進、此其不同者三也、淵聖卽  
位之初、將士奮力、用兵、其後賞刑失當、人心稍解體、  
此其不同者四也、金人圍城之初、城中措置有敘、號  
令嚴肅、晝夜撫循、未敢少休、聞其後無任責者、賊至  
造橋渡壕、恬不加恤、以十數人登城、將士遂潰、此其  
不同者五也、臣在樞密院時、措置起天下防秋之兵、  
降詔書已累月、及臣宣撫河北、卽詔罷大半、蓋朝廷

專恃和議、謂金人必不再來、一切不爲之備、故靖康之末、不能守者、勢不同而禍患生於所忽也。翌日奏事、因哀聚靖康初、建議措置、與金人約和、用兵次第、劄子、及朝廷分置宣撫司、指揮、後在宣撫司論不當、減罷防秋之兵、章疏進呈、上皆命留中、公因奏上曰、靖康間、雖號通言路、然臺諫官、議論艱峭者、皆遠貶、其實塞之也、乃納劄子、勸上以明恕盡人言、以恭儉足國用、以英果斷大事、上皆嘉納、又乞減上供之數、以寬州縣、修茶鹽之法、以通商賈、剋東南官田、募民給地、倣弓箭刀弩手法、養兵于農、籍陝西保甲、京東

西弓箭社、免支移折變、而官教閱之、又請於陝西河北東路、京東西置制置使、以遠近相應援、有旨皆付中書省修具進呈取旨、其後遂置諸路制置使、而餘事以公罷政、皆不果行、初公嘗從容奏上曰、朝廷外則經營措置河北河東、以爲藩籬、葺治軍馬、討平賊盜、內則修政事、明賞刑、皆漸就緒、獨車駕巡幸所詣、未有定所、中外人心未安、夫中原者、天下形勢根本、一去中原、則人心搖而形勢傾矣、臣常建巡幸之策、以關中爲上、襄陽次之、建康爲下、今縱未能行上策、猶當適襄鄧間、示不去中原、以係天下之心、近日外

議紛紜、皆謂陛下且幸東南、果如所言、臣恐中原非復我有、車駕還闕無期、而天下之勢、遂難復振矣。上曰、但欲迎奉元祐太后、津遣六宮往東南耳、朕當與卿等獨留中原、訓練將士、益聚兵馬、雖都城可守、雖金賊可戰、公再拜贊上曰、陛下英斷如此、乞降詔以告諭之、乃命公擬撰詔文、頒降榜之兩京、讀者皆感泣、後半月、上忽降出手詔、欲巡幸東南、以避狄、令三省樞密院、條具合行事件、以聞、公極論其不可、且言自古中興之主、起于西北、則足以據中原、而有東南、起於東南、則不足以復中原、而有西北、蓋天下之精

兵健馬、皆出於西北、一委中原而棄之、豈惟金人將  
乘間以擾關輔、盜賊且將蠡起、跨州連邑、陛下雖欲  
還闕不可得、况治兵勝敵以歸二聖哉、惟南陽光武  
之所以興、有高山峻嶺、可以控扼、有寬城平野、可屯  
重兵、西通關中、可召將士、南通荆湖巴蜀、可取貨財、  
東達江淮、可運糧餉、北距三都、可遣救援、暫議駐蹕、  
自冬徂春、兩河措置就緒、卽還汴都、策無出於此者、  
上乃收還巡幸、東南手詔、令與宰執商議、翌日再具  
劄子、援楚漢滎陽成臯間、曹操袁紹官渡事、論天下  
形勢於前、且曰、今乘舟而適東南、固甚安便、但中原

安則東南安、失中原則東南豈能必其無事、一失機  
會、雖欲保一隅、恐亦未易、臣誠不敢任此責、且陛下  
旣已降詔、獨留中原人心悅服、奈何詔墨未乾、失大  
信於天下、願斷淵衷以定大計、上乃許幸南陽、將以  
秋末冬初、擇日啓行、而潛善伯彥陰以巡幸東南之  
計、動上意、其議頗傳于外、客或謂公曰、士論洶洶咸  
謂密有建議者、東幸已決、南陽聊復爾耳、盍且從其  
議乎、不然、事將變、公曰、天下大計、在此一舉、國之安  
危存亡、於是乎分、成命已行、倘或改易、吾當以去就  
爭之、且上英睿、必不爲異議所惑、不然、吾可貪祿保

身虛受天下之責哉、然自是雖未嘗有改議、巡幸之命、然公初相時、每留身奏事、從容論治體、及有所規諫、雖苦言逆耳、上皆嘉納、至是奏陳當世急務、擬進指揮、多不降出、及每批出、改易已行、指揮頗多、公知譖愬之言、其入已深、一日留身奏上曰、臣近日屢頌宸翰、改正已行事件、臣逐一按據辨明、幸蒙聖察、又所進擬措置機務、多未蒙降出、願臣孤陋寡與、獨荷陛下特達之知、忌媚者多、恐陰有譖愬而離間臣者、夫君子小人、勢不兩立、治亂安危、係其進退、在人主有以察之而已、因出劄子、極論君子小人之理、謂臣

用日奏事、論及人主之職在知人、雖堯舜猶以爲難、  
誠能別白邪正、使君子小人、不至于混淆、然後天下  
可爲、伏蒙宣諭、知人亦非難事、但考其素行、則知之、  
竊仰聖訓、誠得知人之要、且言疑則當勿任、任則當  
勿疑、持狐疑之心者、來讒賊之口、願致察于此、上慰  
諭曰、無此、但朕思慮偶及之耳、其餘章疏見省覽、非  
晚降出、公拜謝而退、至八月五日、遷公銀青光祿大  
夫、尚書左僕射、兼門下侍郎、而除潛善右僕射兼中  
書侍郎、旣命兩相、則潛善顯沮、張所而罷、傅亮、公以  
去就爭之、遂定進退、雖知墮潛善計中、蓋勢不得不

然也、初張所旣受招撫使之命、進言乞置司北京、候  
措置就緒、卽渡河移司恩冀、以圖收復、而權北京留  
守、張益謙奏招撫司騷擾、不當置司北京、欲附潛善  
伯彥、以沮張所、而惑上意也、公曰、張所畫一乞置司  
北京、候措置就緒、日渡河。今所尚留京師、以招集將  
佐、故未行、不知益謙何以知其騷擾、而言不當置司、  
方時艱危、朝廷欲有所經略、益謙小臣、乃敢非理、公  
然沮抑、此必有以使之者、上乃令降旨、招撫司依畫  
一置司北京、就緒日、疾速渡河、張益謙令分析以聞、  
旣剗下矣、樞密院復以益謙申狀將上取旨、凡千餘

言痛詆招撫司、後數日乃關過尚書省、公始見之、乃以樞密院畫一旨、并尚書元降指揮、同將上進呈、與伯彥懃爭于上前、公奏曰、張益謙所奏尚書省已得旨行下、而樞密院又別取旨、痛詆訾之、不過欲與益謙相表裏、以細故而害大計、沮抑張所耳、沮抑張所何足惜、致誤大計、將誰任其責、伯彥懃無所對、第云初不知尚書省已降指揮、上乃令樞密院改正、依前旨行、既不得逞、卽又爲傅亮之爭、初王璿傅亮旣受命爲經制使副、卽申朝廷、謂河東州縣多爲金人陷沒、至于陝西、如河中府解州亦爲所據、與陝府相對、

以河東爲界、今經制司所得兵、纔及萬人、皆烏合之衆、其間多招安盜賊潰散之兵、未經訓練、拊循難以取勝、乞于陝府置司、訓練措置、召募陝西正兵、及將家子弟、結連河東山寨豪傑、度州縣可復、卽復之、可以渡河、卽乘機進計收復、有旨從之、纔十餘日、樞密院取旨、令留守宗澤節制、卽日過河、亮申今欲卽令過河、無不可者、但河外皆金人界分、本司措置、全未就緒、旣過河後、何地可爲家計、何處可以得糧、烏合之衆、使復爲金人之所潰散、何自可以得兵、亮等不足惜、第恐有悞國事、公將上進、呈奏曰、經制司軍旅

未集遽違前議、不卹其措置未集、而驅之渡河、正所以爲賊餌耳、且亮等受命而行、纔十餘日、豈可便以爲逗留、不若只依前旨爲便、潛善伯彥執議、上意頗惑、依違不決者累日、公留身極論其理、具言潛善伯彥始極力以沮張所、賴聖明察之、不得行其志、又極力以沮傳亮、蓋招撫河北、經制河東、皆臣所建白、而張所傳亮、又臣所薦用、力沮二人、乃所以沮臣、使不安其職、臣每鑒靖康大臣不和之失、凡事未嘗不與潛善伯彥商議、而後行、不期二人乃誤用心如此、如傳亮事理明白、願虛心以觀之、則情狀自見、上曰、俟

批出、只令依原降旨、揮于陝府置司、至翌日批出、乃云傳亮兵少、不可渡河、可罷經制司赴行在、公留御批將上奏曰、臣昨日論傳亮事、已蒙宣諭、俟批出、依原降旨、揮、繼奉御批、乃罷亮經制使、不知聖意所謂、上曰、亮既兵少、不可渡河、不如且已、公奏曰、臣論傳亮乞依元降旨、揮、非謂不使之渡河、緣軍旅未集、驅烏合之衆、使之渡河、卽成孤軍、必爲金人所潰、此必潛善等以私害公、陰有以熒惑聖聽、欲以阻臣、使去耳、聖意必欲罷亮、乞以御批降付潛善施行、臣得乞骸骨歸田里、非敢輕爲去就、更望陛下留神熟思之、

使亮不罷、則臣何敢決去、因再拜榻前、上猶慰諭、謂  
不須如此、公退、聞亮竟罷、乃入表劄求去、上遣御藥  
宣押赴都堂治事、復入第二表劄、皆批荅不允、翌日  
遣御藥宣押赴後宮起居、隨宰執奏事、訖、公留身上  
曰、卿所奏事小、何須便爲去就、公曰、人主之職、在論  
一相、宰相之職、在薦人材、方今人材、以將帥爲急、恐  
不可謂之小事、倘以爲小、臣以去就爭之、而天意必  
不可回、臣亦安敢不去、因再拜榻前、復奏曰、臣以愚  
蠢、仰荷睠知、初無左右先容之助、龍飛之初、首命爲  
相、潛善伯彥、自謂有攀附之功、方虛位以召臣、蓋已

切齒及臣至而議論僞楚及請料理河北河東兩路車駕巡幸宜留中原皆與之不同而獨陛下嘉納聽從固宜爲其所嫉臣獨立羣枉之中獨賴陛下察之如傳亮之事曉然無可疑者又不蒙聖察是臣薦進人材不足用議論國事不足採其失職大矣方朝廷承平無事時宰相猶可尸祿今艱難多故之秋當惜分陰臣自度終無當陛下之委任而副天下之責望敢久居此以妨賢路哉且臣嘗建議車駕巡幸不可以去中原潛害等必以此動搖聖意故力沮張所傳亮而去臣臣東南人豈不願奉陛下順流東下爲安

便哉。願車駕巡幸。寔天下人心之所繫。中國形勢之所在。一去中原。則後患有不可勝言者。故不敢雷同其說。以誤大事。願陛下以宗社爲心。以生靈爲意。以二聖未還爲念。留神于此。勿以臣去而其議遂改也。臣仰荷天地之德。雖去左右。豈敢一日忘陛下。不勝犬馬依戀激切之至。因泣辭而退。遂上第三表。劄客或謂公曰。公決于進退。于義得矣。願讒者不止。將有禍患不測。奈何。公曰。大臣以道事君。不可則止。吾知盡事君之道。不可則全吾進退之節而已。禍患非所恤也。畏禍患而不去。彼獨不能諷言者。詆訾而逐之。

哉、天下自有公議、此不足慮、翌日降麻告廷、除觀文  
殿大學士、提舉杭州洞霄宮、時八月十八日也、以九  
月中、抵鎮江府、聞辛道宗之兵、變于秀州、宿留不行  
者半月、聞其掠毗陵、焚丹陽、遂以客舟、由外江以歸  
梁谿、而言者又謂公遣弟綸與賊通、傾家貲以犒賊、  
爲緋巾數千頂與之、朝廷不復究問其實、有旨落職、  
令鄂州居住、公荷上知遇、付以國事、當軸秉鈞、纔七  
十有五、日而罷、旣罷之後、張所亦以罪去、傅亮以母  
病不赴行在而歸陝西、招撫經制司皆廢、車駕遂東、  
幸而兩河郡縣皆陷于賊、金人以次年春擾京東西、

深入關輔、殘破尤甚、凡募兵買馬、團結訓練、車戰水  
軍之類、一切廢罷、中原盜賊蠡起、跨州連邑、朝廷不  
能制、率如公之所料也、二年戊申、十月、有旨謫降官  
不許同住一州、移公澧州居住、會有上書訟公之冤  
者、復有論列、十一月、謫授單州團練副使、移萬安軍  
安置、三年、行次瓊州、三日、而德音放還、任便居住、四  
年、自嶺表訪家鄱陽、未幾挈家還邵武、七月、復銀青  
光祿大夫、紹興元年、辛亥、三月、提舉杭州洞霄宮、九  
月、復資政殿大學士、

點  
點  
點

六  
十  
四

宋李忠定公文集選卷首之四

行狀下

計字九千五百九十八个

紹興二年壬子二月八日除觀文殿學士、克荆湖廣南路宣撫使、兼知潭州、公以憂患之餘、具奏辭免、且致書宰執、力陳所以不敢當之意、四月七日、內侍于蓋傳宣撫問、散遣上道、乃還、公迫不得已、祇受告命、樞密院差任仕安兵三千人、以二十四日、假福州貢院開司、五月六日、啓行、有旨、就孟庾韓世忠下撥統制辛企宗郝最兩軍、及令現在湖南岳飛韓京吳錫吳全等軍、聽受節制、初荆湖自庚戌春、爲金人蹂踐、

土賊如鍾相雷進楊華鄧裝李冬至各擁數萬之衆  
殘破州縣保據巢穴西北流離之人相率渡江州縣  
不能制禦孔彥舟據潭州後爲馬友所逐李宏據岳  
州劉忠寨于江湖兩界出沒數路而曹成兵犯郴衡  
永道以及二廣湖南安撫使向子諲爲曹成虜置軍  
中民不聊生韓世忠原留統制官董旼招曹成成雖  
受招而焚掠如故公是時總師由廬陵入本路界聞  
曹成將自邵入衡以趨江西而董旼所帶親兵纔數  
百人勢不足以彈壓卽駐泊衡陽先遣使臣賁勝約  
束令放散驅虜老幼及嚴戢其徒不得作過曹成至

邵以公狀申稱放散三萬餘人尚有四萬至衡率頭  
首百餘赴本司公叅公召與語且以善言慰撫之戒  
以所至不得騷擾俟出境寧肅當爲保奏成感泣聽  
命一路遂以無事曹成旣出境長沙報馬友之党頭  
首步諒等衆二萬餘人自筠袁還犯本路焚掠醴陵  
攸縣衡山屯泊于魚集市放兵四出人情震動公乃  
留統制官韓京屯茶陵統領陳照屯安仁統領湯尚  
之及將官白德屯衡州以備賊衝乃親率大軍趨衡  
山有獻策者謂自衡山至魚集市三十餘里隔湘江  
及茶陵江凡兩涉水不若自白沙濟師卽一涉水白

沙在衡州來路、去衡山三十里、去賊壘亦三十餘里、賊無斥候、必不虞官軍之渡、可以得志、公從其言、乃約衡州、備舟楫于白沙岸下、駐衡山之次日、令統制官任仕安、吳錫、率將佐軍馬、還自白沙、連夜渡江、凌晨叩賊壘、賊衆倉卒出拒、見官軍徧滿山谷、戈甲旗幟鮮明、知不可敵、乃降、先是賊遣四千餘人、出掠、欲犯衡、郴諸郡爲陳照湯尚之等所遏、公遣使臣賁勝諭以步諒等已降、老小盡在本司存恤、宜早自歸、亦令步諒遣人同往招之、出掠之衆悉還聽命、凡得首領、統制統領官十餘人、將佐五十餘人、使臣五百餘

人共衆萬有九千餘人、允江湖間驅虜人、并疾病老弱者、並給公據放散、擇強壯精銳、得七千餘人、分隸諸將、旣揀汰放散訖、卽令精強者、每五百人爲一部、擺列于湘江灘磧中、公御中軍、張具軍容、乘高以臨之、諭以爾等皆朝廷赤子、失業至此、良可矜憫、今旣歸降、並令與舊軍和雜團結、祇刺手背、允新軍所得財物輜重、預行約束、並不得毫髮侵動、本司自以三萬緡、及所獲牛畜等犒賞、以故人情安帖、自衡山趨長沙道中、無散逸者、其後措置招降、並皆放此、入長沙交割潭州職事、時湖南瀕年爲盜賊所據、州縣官

類多權捫、乘時爲奸、公于視事日、枷項巨猾付獄、得入已、賊凡三萬六千緡、具案上之、其餘州縣、權攝官、以漸易置、爲民所訴訟者、乃按治之、于是望風引退者甚衆、賊吏稍戢矣、方入境之初、召見長老、問民所疾苦、皆謂所苦者、無甚于盜賊、與科需、公旣措置招捕羣盜、而科需之弊、一縣至有十萬緡者、公卽移檄州縣、盡罷科率、非奉使司指揮、而擅科率者、以軍法從事、凡日前科需之物、並以正賦准折、又荆湘間、民戶輸納稅米、率四石、始了納一石、百姓貧困、仍檄漕司行下州縣、除官耗外、不許增加升合、以故流移歸

業民皆樂輸、是冬、長沙頗稔、得稅米四十餘萬石、軍儲遂足、方李宏之殺馬友也、王進王俊以五千餘人遁去、據七星寨、在湘鄉寧鄉安化三縣之間、日肆焚掠、一方騷然、公抵長沙之次日、命郝晟出師、次七星寨、進以衆三千人約降、俊以二千餘犯安化、及破州新化、以逼邵陽、公遣吳錫以其麾下、由徑路趨邵陽、以討王俊、錫率所部、倍道兼程、自潭五日而至邵、王俊之衆、去邵纔數十里、而錫兵至、適雪作、錫乘其不備、縱兵掩擊、殺千餘人、生擒俊、餘衆悉降、自是湖南境內、潰兵爲盜者悉平、民漸安居、惟江西接境間

有出沒、如劉超、張成等、多者數千人、少者亦不下千數、遂檄江西會合夾擊、且招且捕、節次悉降、揀汰放散外、得精壯又數千人、郴州土賊鄧裴、彭鐵、大攸縣土賊王順等、分遣韓京等討之、以故境內悉平、獨湖北楊么者、鍾相餘黨、以左道惑民、據洞庭重湖之險、北達荆南、公安、西及鼎澧、東至岳陽、南抵長沙之湘陰、益陽、周環千里、出沒作過、有衆數萬、于是旋創戰艦、命統領官李進屯湘陰、馬準屯益陽、以備之、吳錫屯橋口、破其數寨、么不敢犯、先是長沙遭兵火、尺椽無有、市井蕭然、公留衡陽日、先遣官造州宅、使廳門

廡堂屋之類卽入城始及甲仗庫州官廨舍兩獄倉庫等又造營房六千餘間民稍歸業易草舍以瓦屋城市始就緒帥府制度日以備具時有統制官張忠彥者緣討捕駐軍廣州挾制州縣供億以萬計一路震擾屢欲爲變撥隸孟庾韓世忠岳飛並不稟命至是撥隸公麾下遣使臣召之不報忠彥意樂爲郡公因檄令權知岳陽忠彥果來卽械送所司取旨諸路帥臣帶宣撫者並罷公止帶湖南路安撫使公嘗建議謂荆湖之地縣數千里南通二廣北控襄漢東接江淮自晉蹕爲上流諸葛亮謂之用武之國今朝廷

保有東南、制御西北、荆湖諸郡、如鼎澧岳鄂、連荆南  
一帶、皆當屯宿重兵、倚爲形勢、使西川之號令、可通  
襄漢之聲援、可接。乃有恢復中原之漸。蓋公之志氣  
其素所蓄積也。丐祠得請、乃以節次招降到潰兵盜  
賊人數、及見管軍馬數目、打造戰船、教習水戰次第、  
并見在金銀錢物、與江西廣南、未支撥到錢米之數、  
逐一具奏、卽行。四年四月得旨、令省記編類。建炎元  
年五月、以後時政記。公乃以昨任宰相日得聖語、及  
所行政事、賞刑黜陟之大略、著建炎時政記、以進。有  
旨宣付史館。是冬、虜僞入寇、侵犯淮甸、邸報旣傳、中

外憂憤、公具奏、以今日捍禦賊馬事勢、試爲三策、以獻其大略曰、今僞齊悉兵南下、其境內必虛、倘命信臣乘此機會、擣潁昌、以臨畿甸、電發霆擊、出其不意、則僞齊必大震懼、呼還醜類、以自營救、王師追躡、必有可勝之理、非惟牽制南牧之兵、亦有恢復中原之兆、此上策也、朝廷或以茲事甚大、則鑾輿駐蹕江上、勢須號召上流之兵、順流而下、旌旗金鼓、千里相望、以助聲勢、則敵人雖衆、豈敢南渡、仍詔大將帥其全師、進屯淮南要害之地、設奇邀擊、絕其糧道、賊必退遁、保全東南、徐議攻討、此中策也、萬一有借親征之

名爲順動之計。委一二大將。捍敵于後。則臣恐車駕  
旣遠。號令不行。賊得乘間深入。州縣望風奔潰。其爲  
吾患有不可勝言者矣。此最下策也。往歲金人南渡。  
利在侵掠。旣得子女玉帛。而時方暑。則勢必還師。今  
僞齊使之渡江而南。必謀割據。將何以爲善後之計  
哉。故今日爲退避之計。尤不可。倘朝廷措置得宜。將  
士用命。則此賊安知非送死于我。願一時機會。所以  
應之者如何耳。望降臣章。與二三大臣熟議之。有旨  
以公所奏皆今日急務。已付三司樞密院施行。降詔  
獎諭。公旣以三策奏陳。時又報韓世忠統全軍于淮。

楚間、迎擊賊兵、連獲勝捷、有旨分遣臺臣、督劉光世、張俊、統兵渡河、應援、車駕已發、進臨江上、撫勞諸軍、公又條奏宜備者四、曰生兵、曰海道、曰上流、曰四川、至于保據淮南、調和諸將、增置禁衛、廣備糧食、措置戰艦水軍、及措置揚么凡十事以獻。五年、乙卯春、詔問凡今攻戰之利、守備之宜、措置之方、綏懷之略、可悉條具來上。公乃條對以獻。其略曰、議者或謂賊馬既退、當遂用兵、爲大舉之計、臣切以爲不然、今朝廷以東南爲根本、倘不先爲自固之計、將何以能萬全勝敵、又況將士暴露之久、財用調度之煩、民力科取

之困、謂宜大爲守備、痛自料理、使之蘇息、乃爲得計、  
議者又謂賊馬旣退、當且保據一隅、以苟目前之安、  
臣又以爲不然、宜於防守旣固、軍政旣修之後、卽議  
攻討、乃爲得策、此二者守備攻戰之序也、至於守備  
之宜、則當料理荆襄、以爲藩籬、葺理淮南、以爲家計、  
異時可省經費、爲無窮之利、守備之宜、莫大於是、有  
守備矣、然後可以議攻戰之利、亦當分責於諸路大  
帥、謂如淮東之帥、則當責以收復京東、東路、淮西之  
帥、則當責以收復京西路、荆襄之帥、則當責以收  
復京西南北路、川陝之帥、則當責以收復陝西五路、

諸路剋捷。因利乘便。收京畿。復故都。至於臨事制變。不可預圖。願勿失機會而已。若夫措置之方。則臣願駐蹕建康。綏懷之略。則臣願先爲自強之計。大槩近年所操之說有二。閒暇則以和議爲得計。而以治兵爲失策。倉猝則以退避爲愛君。而以進禦爲誤國。衆口和之。牢不可破。今天啓宸衷。親臨大敵。逆臣悍虜。數十萬衆。潛師宵遁。則和議之與治兵。退避之與進禦。其效槩可覩矣。臣願自今以往。不復爲退避之計。可乎。古者敵國善鄰。則有和親。仇讐之邦。鮮復遣使。今使輶往來。邀我以必不敢爲之事。於吾自治自彊。

之計。動輒相效。金人二十餘年。以此策破契丹。困中國。曾不知其害。臣願自今以往。勿復遣和議之使可乎。二說既定。藩方協力。將士用命。雖強虜不足畏。雖逆臣不足憂。特在陛下方寸間耳。臣昧死條上六事。一曰信任輔弼。二曰公選人才。三曰變革士風。四曰愛惜日力。五曰務盡人事。六曰寅畏天戒。反覆論議幾萬言。皆切中時病。內變革士風。尤爲著明。其略曰。夫用兵之際。似與士風初不相及。然士風淳厚。則論議正。而是非明。賞罰當。而人心服。士風澆薄。則一切反是。晉之士風。尚虛浮而不事事。當時措置乖謬。盜

賊並起。而有五胡亂華之禍。本朝嘉祐治平以前。士風何其淳厚也。自數十年來。非特不事事而已。奔競爭進。議論徇私。邪說利口。足以惑人主之聽。元祐大臣。如司馬光之流。皆持正論。而羣枉嫉之。指爲姦黨。士風遞相倣倣。顛倒是非。變亂白黑。政事大壞。以馴致靖康之變。逮今數十年。愛憎之情。銷盡。然後朝廷始知元祐羣臣之忠。褒贈官秩。錄用子孫。然已何補於事。曷若早變此風。則忠臣無誅謫之冤。國家有治安之實。豈不美哉。臣觀近年士風尤薄。不顧國體。惟欲進身。不覈事實。惟欲傷人。大言則大進。小言則小

遷。諭訛成風。此非朝廷之福也。陛下得一張浚。付以重權。使禦強敵於關陝。雖以忠許國。事失機會。不爲無過。言者痛繩醜詆。誣以大惡。豈不太甚歟。浚有浴日之功。足以結陛下之知。有大臣之辯。足以回陛下之聽。故得自洗濯。復侍清光於帷幄之中。然其所傷已多矣。藉使遭謗。用讒之臣。無浚之功。又無大臣之辯。白。而有下石以擠之者。則何以自雪於君父。冀察其不然哉。夫朝廷設耳目。及獻納論思之官。以廣視聽。固許之以風聞。至於大故。亦須覈實。使果如其言。則誅責所加。豈宜止從輕典。使言而無實。則誣人之

罪。伏讒蒐慝。得以中害善良。皆非所以修政也。臣願  
陛下降明詔以戒諭士大夫。使體德意。從忠厚。變近  
年澆薄之風。將見士風淳厚。而中興之業不難致矣。  
又曰。陛下視建炎以來。其所措置。是邪非邪。以爲是。  
則何以不見其效。以爲非。則安可復蹈其轍。臣前所  
陳。皆改轍之道。非循舊跡所能爲也。擇善而從。斟酌  
而行。則在陛下。所謂善後之策。何以加之。閏二月復  
觀文殿大學士。再任提舉西京嵩山崇福宮。蒙降親  
筆手詔。以公條具賊邊事宜。已施行外。特賜褒諭。十  
月除江南西路安撫制置大使。兼知洪州。公兩具辭。

免復賜親筆勉公使行且得旨許赴行在奏事畢之  
官六年丙辰二月准告兼營田大使二十四日到國  
門翌日內殿引對上慰勞再四以已見利害并本路  
職事再對于內殿三月一日朝辭得旨引見進呈劄  
子凡十有六而論中興及金人失信襄陽形勝與夫  
和戰朋黨五事皆利害之大者其詳具奏疏先是公  
以靖康間道君淵聖所賜御書刻石因呂祉以示張  
浚浚以上聞至是因蒙宣諭欲見道君御書真蹟具  
奏以進外又以劄子繳進靖康間奉迎錄曰臣靖康  
初任知樞密院事被淵聖皇帝占迎奉道君太上皇

帝于南京、蒙道君賜對、聽納其說、罷幸亳社、西洛、旋歸京師、二聖重歡、四海胥慶、道君察臣之忠、賜以御筆、禮貌優異、淵聖察臣之忠、賜以親筆、褒諭再三、而靖康之末、臣旣去位、羣枉當國、與臣爲仇、顛倒是非、變亂黑白、孫覲因召試中書舍人、作戒勵詔、顯詆臣爲指天畫地、睥睨兩宮、唐恪因令榜於朝堂、士大夫信以爲然、罕有知其實者、銜冤抱憤、順受黜闇、不敢自明、伏遇皇帝陛下、盛德日躋、大明旁燭、凡臣子之忠於所事、而爲回邪之所誣蔽、有跡可考者、悉蒙昭雪、君人之道、孰先於此、臣近嘗以二聖所賜御筆、刻

之琬琰、蓋欲侈大其賜、因自辨白、以裝成碑本、託給事中臣祉、以示右僕射、臣浚、遂獲上聞、伏蒙宣諭、欲見道君御筆真蹟、臣已恭依聖訓、具奏繳納外、有臣靖康間所編奉迎錄、并臣進呈劄子二首、徐處仁等表一道、道君御製書詞一首、淵聖御筆宣諭一首、繕寫合成一軸、謹具劄子繳進、仰塵天聽、伏望聖慈、特加睿察、得旨、送史館、是時朝廷銳意大舉、既遣相臣張浚視師川陝荆襄、又降制命、以韓世忠岳飛爲京東京西路宣撫使、上嘗面諭公以十數年來訓練士卒、今方可用、公旣陞辭以行、因極論所以進兵者、具

劄子以奏謂今日主兵者之失大畧有四、兵貴精不貴多、多而不精、反以爲累、陣貴分合、合而不能分、分而不能合、皆非善置陣者、是四者、今日諸將之失、願陛下明詔之、使知古人用兵之深意、非小補也、朝廷近來措置恢復、有未盡善者五、有宜預備者三、有當善後者二、何謂有未盡善者五、善制國用者有、生財之道有、節用之法有、救弊之說有、覈實之政有、懋遷之術有、闔闢之權、審此六者、則雖養兵之多、何患乎財用之不足、而朝廷初不留意於此、惟務降官、告給度牒、賣戶帖、理積欠、折帛博糴、預借和買、名雖不同、

其取於民一也、此未盡善者一也、議者謂當因糧於敵、臣以爲敵人聚糧、或有敗北焚蕩而去、必不使爲我有、若欲取於僞地之民、則官軍抄掠、甚於寇盜、有違弔伐之義、失民望而堅從賊之心、非計之得、此未盡善者二也、金人專以鐵騎勝中國、而吾平時不務爲可以制鐵騎之術、此未盡善者三也、喜今朝廷與諸路之兵、悉付諸將、外重內輕、緩急何以使之捍患而却敵哉、此未盡善者四也、臣於陛辭日、竊聞麻制、以韓世忠岳飛爲京東京西路宣撫使、聖意可謂斷矣、然兵家之事、行詭道、今吾軍初未嘗有其實、而遽以先

詳  
籌畫周

聲臨之、其可乎、此未盡善者五也、何謂宜預備者三、  
中軍旣行、宿衛單弱、肘腋之變、不可不虞、此行在不  
可不預備者一也、江東東西荆湖南北、兵將盡行、屯  
戍鮮少、敵人或有乘間擣虛之謀、則將何以待之、此  
上流不可不預備者二也、海道去京東不遠、乘風而  
來、一日千里、蘇秀明越、全無水軍、則下流不可不預  
備者三也、何謂當善後者二、使王師克捷、能復京東  
西地、則當屯以何兵、守以何將、金人來援、當何以待  
之、兩路之民、懷戴宋之心、堅甚、萬一得其地、而不能  
守、得其民、而不能保、兩路生靈、虛就屠戮、而使兩河

之民絕望於本朝、則恢復之功難爲力矣、勝猶如此、則所以圖爲善敗之計者、宜如何哉、此當善後者二也、二十三日、至撫州金谿界、交割本路安撫制置大使職事、是時朝廷以本路旱災、饑民闕食、御筆詔書、令帥守監司、多方勸誘、積米之家、以其食用之餘、盡數出糶、濟此流殍、公卽條具具奏、又延見父老、詢問疾苦、乞將災傷路分第三等以下人戶、四年積欠、時與蠲免、又奏乞旋賜本錢十萬貫、以爲營田之本、先是降詔以六月乙巳地震、求直言、公應奏陳八事、時虔吉盜賊爲患、公以爲虔寇巢穴、多在江西、福建、廣

東三路界首、置立寨柵、爲三窟之計、一處有兵、則散  
往他處、官軍旣退、則又復團聚、遣發軍馬、不能窮討、  
正以節制不一之故、若節制歸一、使其不能散逸、且  
捕且招、威令旣行、則窮寇別無他策、必須自歸、然後  
結以恩信、使之改過自新、將賊首及徒黨傑黠之人、  
盡赴軍前使用、以除後患、此最策之上者、乞於江西  
路置都統制一員、節制三路軍馬、以招捕虔賊、至於  
盜賊衰息之後、又須縣令得人、勞心撫字、使作過桀  
黠之人、旣去、良民得以復業、安於田畝、乃可以化盜  
區、復爲樂土、然虔之諸縣、多是煙瘴之地、盜賊出沒

不常、朝廷初無賞格、士大夫之有材者、多不願就、又難強之使行、欲望朝廷優立賞格、將來辟置、知縣到任、半年、盜賊消除、良民復業、選人特與改官、京朝官與轉一官、候任滿日、各再轉一官、其賊平定之後、量與蠲免租稅、已前欠負、並免催科、庶幾官吏盡心、民庶安業、復有承平之象、初、洪州城池遭金人殘破之後、城壁摧毀、壕塹堙塞、兼闊遠難以防守、公相度裁減、築濬、用度既省、處畫有序、不擾而辦、城高池深、民有所依、是年王師與虜僞相持於淮泗、幾半年、公具奏、謂自古用兵、相持既久、則非出奇、不足以取勝、願

速遣得力兵將自淮南前來斬黃間、約岳飛兵爲犄角夾擊之、大功可成、旣而王師屢捷、劉光世、張浚、楊沂中、大破僞齊賊馬於淮淝之上、斬馘擒捕甚衆、殘黨遁歸、淮北、公又奏陳利害、大略謂、切見間探所報、僞齊乞兵於虜人、頭項頗多、未聞有渡淮而南者、其侵犯淮淝、及光山、六安等處、只有李成、孔彥舟、叛將簽軍、深慮賊情狡猾、匿重兵於後、而以簽軍來嘗我師、若一勝之後、兵驕將惰、則爲患有不可勝言者、伏望降詔諸將、益務淬勵、以待大敵、仍按圖以視諸路、某路固實、當設疑以款賊兵、某路空虛、當增兵以禦

侵掠、使江淮之間、表裏相資、首尾相應、有旨以公奏  
陳防秋利害、切中事機、降詔獎諭、七年正月、以公賑  
濟饑民、招還流亡、降詔獎諭、及車駕將幸建康、公具  
劄子、乞益修戰守之具、浚淮修築城壘、二月報徽宗  
皇帝升遐、寧德皇后上僊、公既奉慰表、又具劄子乞  
推廣孝思、益修軍政、二十七日、車駕進發、巡幸建康  
公奉表起居、又具劄子論建中興之功、大槩曰、願陛  
下益廣聖志、擴而充之、與神爲謀、日新其德、勿以去  
冬驟勝、而自怠、勿以目前粗定、而自安、凡可以致中  
興之治者、無不爲、凡可以害中興之功者、無不去、有

所規畫措置必以天下爲度、必以施於長久、可傳於後世爲法、則中興不難致、夫中興之於用兵、止是一事、要以修政事、信賞罰、明是非、別邪正、招徠人、林鼓作士氣、愛惜民力、順導衆心爲先。數者旣備、則士奮於朝、農安於野、穀粟充盈、財用不匱、將帥輯睦、士卒樂戰、用兵其有不勝者哉。繼進舉直言極諫之士、乞不必遠召將帥二劄子。四月十六日、有旨以公典藩踰年、民安盜息、寬朕憂顧、宜有褒嘉、可特轉左金紫光祿大夫。六月上、遣中使傳宣撫問、賜夏藥、兼銀合茶藥。先是虔寇以守臣失於撫循、致招安人、蠭起爲

盜雖官軍屢捷、賊黨甚衆、公致書宰相、以張鬻材術  
正可任此、所以薦之者甚力、其後朝廷果命鬻、自鬻  
移守虔州、招安說諭、並令放散徒黨、赴州、公參與免  
罪犯、八月諸路大旱、公具劄子、乞益修政事、以救今  
日之弊、大略謂前年江湖閩浙、嘗苦大旱、流殍相望、  
陛下軫慮之深、親灑宸翰、勸誘賑濟、至誠動天、報以  
休應、歲大豐穰、民以安樂、自一稔之後、上下恬嬉、不  
復勤恤、民隱、朝廷百色誅求、上供不以實數、而以虛  
額、和糴不以本錢、而以關子、絲蠶未生、已督供輸、禾  
穀未秀、已催裝發、州縣困於徵輸、文移急於星火、官

吏愁歎、閭里怨咨、感動天心、旱災復作。然則陛下欲銷弭災異、導迎吉祥、不必他求、但如前日之用心、自然感召和氣、休應立臻、繼旱暵復爲豐年矣。夫今日之患、欲民力寬、則軍食闕矣、欲軍儲裕、則民財匱矣、非有術以權之、使歛不及民、而軍食足、不可得而均也。惟陛下留神邦本、天下幸甚。及探報鄺瓊叛歸僞齊、公具奏指陳朝廷措置失當者五、深可痛惜者五、及鑒前失以圖將來者五、凡十有五事、且言天地之變、不足爲災、人不盡言之足患、侍從者獻納論思之官也、臺諫者耳目心腹之寄也。今侍從臺諫以言爲

職類皆毛舉細故以塞責、所論不過簿書資格、守倅  
令丞除授之失當、至於國家大計、係社稷之安危、生  
靈之休戚者、未嘗聞有一言及之、陛下試察、如淮西  
之變、侍從臺諫之臣、亦有見危納忠、爲陛下言之者  
乎、大臣懷祿而不敢諫、小臣畏罪而不敢言、此最今  
日之可憂者、仍具奏以論列淮西叛將事宜、其言指  
陳朝廷措置失當、但欲納忠於國、情迫言切、必有抵  
忤、難以復當帥守之寄、乞降旨黜責、或除一外任官  
觀、九月、又具奏乞外祠、且以到任以來、賑濟饑民、招  
填軍額、建置營房、修築城池、繕治器甲、增修官府、朔

蓋倉庫、催發錢糧、招捕盜賊、並逐一躬親措置、處畫  
事件、釐爲六狀、繳奏、有旨以公奏陳淮西事宜、切中  
事機、降詔獎諭、時張浚旣罷相、外議皆謂車駕將幸  
平江、公謂平江去建康不遠、徒有退避之名、而言者  
引漢武誅王恢事以爲比、非是、乃復奏陳利害、大畧  
曰、臣切見張浚罷相、言者引漢武誅王恢事以爲比、  
臣恐智謀之士、卷舌而不談兵、忠義之士、扼腕而無  
所發憤、將士解體而不用命、州郡望風而無堅城、陛  
下將誰與立國哉、伏望陛下堅聖心而勿動、修軍政  
以自強、無爲趣時獻言者之所搖動、古語曰、臨大難

而不懼聖人之勇也、夫張浚措置失當、誠有罪矣、然其區區徇國之心、有可矜者、願少寬假、以責來效、時建康移蹕之謀、既審、公具奏利害、大略曰、臣聞自昔用兵以成大業、必先固人心、作士氣、據地利而不肯先退、盡人事而不肯先屈、是以楚漢相距於滎陽、成臯間、高祖雖屢敗、不退尺寸之地、既割鴻溝、羽引而東、遂有垓下之亡、曹操袁紹戰於官渡、操雖兵弱糧乏、荀彧止其退師、既焚輜重、紹引而歸、遂喪河北、由是觀之、今日之事、豈可因一叛將之故、望風怯敵、遽自退屈、果出此謀、六飛回馭之後、人情動搖、莫有固

志士氣銷縮、莫有鬪心、我退彼進、使賊馬南渡、得一  
邑則守一邑、得一州則守一州、得一路則守一路、亂  
臣賊子、黠吏姦氓、從而附之、虎踞鴟張、雖欲如前日  
返駕還轅、復立朝廷於荊棘瓦礫中、不可得也。借使  
虜騎衝突、不得已權宜避之、猶爲有說。今幸疆場未  
有警急之報、兵將無不利之失、朝廷止可懲往事、修  
軍政、審號令、明賞刑、益務固守、而遽爲此擾擾、棄前  
功、蹈後患、以自趨於禍敗、豈不重可惜哉。臣故曰車  
駕不宜輕動、靜以鎮之者此也。又具防冬畫一奏、請  
方欲候報措置、而以論列淮西言及臺諫、遂犯臺諫

之怒、竟以言者之故、簡會累乞宮觀、奏章提舉臨安府洞霄宮、時未有代者、懲靖康之故、且以本司積蓄財穀之數、申奏、旣而除端明殿學士、李光爲代、公貽書具言所以措置之意、八年正月、還次長樂、是冬、以王倫使事具劄子奏陳、大畧曰、臣竊見朝廷遣王倫使金、奉迎梓宮、往返屢矣、今倫之歸、與虜使偕、乃以江南詔諭爲名、不置國號、而曰江南、不云通問、而曰詔諭、此何禮也、臣請試爲陛下言之、金人毀宗社、逼二聖、而陛下應天順人、光復舊業、自我視彼、則仇讐也、自彼視我、則腹心之疾也、豈復有可和之理、然而

朝廷遣使通問、冠蓋相望於道、卑詞厚幣、無所愛惜、者。正以二聖在其域中、爲親屈已、不得已而然。猶有說也。至去年春、兩宮凶問旣至、遣使以迎梓宮、亟往遄返、初不得其要約、今倫使事初以奉迎梓宮爲指、而虜使之來、乃以江南詔諭爲名、循名責實、已自乖戾、則其所以罔朝廷而生後患者、不待詰而可知。臣在遠方、不足以知其曲折、然以愚意料之、虜以此名遣使、其邀求大畧有五、必降詔書、欲陛下屈體降禮、以聽受一也、必有赦文、欲朝廷宣布頒示郡縣、二也、必立約束、欲陛下奉藩稱臣、稟其號令、三也、必求歲

快明白痛

賂、廣其數目、使我坐困、四也、必求割地、以江爲界、淮  
南、荆襄、四川、盡欲得之、五也、此五者、朝廷從其一、則  
大事去矣、金人變詐不測、貪婪無厭、縱使聽其詔令、  
奉藩稱臣、其志猶未已也、必繼有號召、或使親迎梓  
宮、或使單車入覲、或使移易將相、或改革政事、或竭  
取賦稅、或朘削土宇、從之則無有紀極、一不從、則前  
功盡廢、反爲兵端、以爲權時<sub>宜</sub>之聽其邀求、可以無後  
悔者、非愚則誣也、使國家之勢單弱、果不足以自振、  
不得已而爲此、固亦無可奈何、今土宇之廣、猶半天  
下、臣民之心、戴宋不忘、與有識者謀之、尚足以有爲

豈可忘祖宗之大業。生靈之屬望。弗慮弗圖。遽自屈服。祈哀乞憐。冀延旦暮之命哉。臣願陛下特留聖意。且勿輕許。深詔羣臣。講明利害。可以久長之策。擇其善者而從之。疏奏。雖與衆論不合。上不以爲忤。嘗降玉音。謂宰執曰。大臣當如此矣。九年二月。除潭州荆湖南路安撫大使。公累具辭免。悉降詔不允。又具奏力辭曰。臣迂疎無周身之術。動致煩言。今者罷自江西。爲日未久。又蒙湔洗。畀以帥權。昔漢文帝聞季布賢。召之。旣而罷歸。布曰。陛下以一人譽召臣。一人毀去臣。臣恐天下有識者。有以窺陛下也。願臣區區進

退如雙鳬乘鴈之去來、何足少多、然數年之間、亟奮  
亟躋上累、陛下知人任使之明、實有繫于國體、有旨  
以公累具奏陳、可依所請、依舊提舉臨安府洞霄宮、  
仍降詔示、不欲重違之意、十年庚申正月十一日、中  
使徐珣傳宣撫問、初公之叔第經博學多識、公所以  
期之者甚遠、不幸早世、公悼恨不能自己、適上元日、  
具家饌致祭、公撫几號慟、倉卒感疾、是日薨于叔第  
之居、特贈少師、官其親族十人、命公之仲弟維自浙  
東提點刑獄、移閩部、以營塋事、三省樞密院遣官致  
祭、所以存恤者甚厚、是年十二月十四、塋於福州懷

安縣桐口大家山之原十三年以長子儀之升朝遇郊祀恩贈太保十六年再贈太傅以三子集之郊祀恩三贈太師以五子申之請于上蒙恩賜謚忠定公娶鄱陽張氏故直龍圖閣贈左金紫光祿大夫根之女故資政殿大學士會稽郡公黃公履之外孫累封越國夫人進封魯國太夫人後公十二年薨子男八人長曰儀之右奉議郎次曰宗之右宣教郎次曰集之右通直郎新差充福建提點刑獄司幹辦公事次曰潤之次曰望之俱早卒次曰茂之後公百餘日卒次曰秀之右宣義郎新差充福建路轉運司幹辦公

事、次曰申之女七人、孫男九人、長曰震、次曰泰、次曰升、次曰晉、俱右承務郎、次曰蒙、次曰同、次曰謙、次曰需、次曰頤、孫女六人、公資父事君、移孝爲忠、誠意所至、是非利害、煥然明白、直道而行、無毫髮自爲心、所爲所言、合於往古、驗於方來、天下之人、信之如蓍龜、仰之如太山北斗、受知三朝、以身之用舍、爲社稷生民安危、其所論列、無非天下大計、勤勤懇懇、古人所謂慟哭流涕、長太息者、其事未足道也、自爲御史、一對而罷、旣爲識者之所推與、至於左史、論暴水、達謫閩嶠、故老前輩、莫不爲之咨嗟歎服、固以任天下之

重期之去國七年、賜環未幾、虜騎果至、宛若疇昔、巨浸之環都城、爰從庶僚、建大策、畫長筭、外捍黠虜、內釋羣疑、雖小人共朝、所以摧沮敗壞者、無所不至、然而卒全都城、安宗社、使黠虜引而北歸、惟淵聖能用公於倉卒之際故也、道直則身危、功高則謗多、羣姦方以公去位爲得計、而國家之事、有不可勝諱者矣、嗚呼、此天耶、其人耶、聖主嗣興、公首膺爰立、凡所以爲上處畫者、規模宏遠矣、同列害成、少日竟罷、讒言巧詆、人爲寒心、惟聖主察其精忠、每躡輒起、忠言嘉謨、遇事憤發、感激深切、不復顧身、閒居無事、一話一

言未嘗不在國家、迨將薨、謝爲綸論天下事、且以比  
者奏疏爲言、悵然久之、言猶在耳、起奠叔兄、一慟而  
絕、嗚呼痛心之極、豈特爲吾家也哉、晉韓魏公稱司  
馬溫公、大忠大義、充塞天地、橫絕古今、有志之士、同  
有執鞭之願、使魏公尚在、覩公之所爲、所守、則其所  
稱道、將何如邪、公於諸弟、友愛旣篤、相知尤深、嘗有  
國士之稱、然而未始效世俗相推挽也、紹興七年、郊  
祀恩、當奏子公之子、未官者三人、乃以仲兄之子琳  
之名聞、至叔兄不幸、抱恨遽終、嗚呼痛哉、可以興百  
世之下矣、而綸之不肖、無狀、蒙公之所以愛憐者、蓋

蔑以加、未薨半月、抱送幼子、殆預識去期、聞者驚歎、方先衛公無恙時、每欲於邵武置義莊、以贍宗族、有志未就、公晚年乃決意成之、遠邇懽欣、非獨被惠者懷感也、公平生交游、皆一時名士、其所薦進、不可勝言、故有聞其名稱、初未識面、而旣蒙引拔者矣、然而與其進、不保其往、旣而以怨報德、負公益多、而公未始以此怠於待士也、陳少陽平生未識面、其慕公之誠、至爲公死、若少陽與公、真不愧古人矣、若乃放意山林、昆弟朋友、把酒賦詩、談笑酬唱、動盈卷軸、每有奏議、下筆數千言、俄頃而就、蓋公平日以愛君憂國

爲心、籌畫計策、胸中素定、故遇事成章、如是之易也、  
晚於易、尤有所得、著易傳內篇十卷、外篇十二卷、其  
言微妙、有深長之味、頗取卦變互體爲說、動有所稽、  
異於今世君子之所辨釋、又著論語詳說十卷、所以  
發明聖賢之意甚備、而文章歌詩奏議、凡百有餘卷、  
其在政府、帥閫、紀一時之事、則有靖康傳信錄、奉迎  
錄、建炎時政記、建炎進退志、建炎制詔表劄集、宣撫  
荆廣記、制置江右錄、惟公勲在王室、德在生民、至忠  
大節、孝誠友愛、罔不具備、雖身或不用、用不久、其光  
明傑出、固已如此、而薨謝有年、未克銘諸幽宮、是敢

輒狀公之行事、有求于大君子、惟其文辭鄙拙、無敘  
次之能、不足以發揚公之盛德、不勝媿懼、謹狀、

紹興二十六年六月、弟右奉議郎通判洪州、主管學  
事、賜緋魚袋、綸狀、

統計三萬二千九百四十五字

